

13.

22

c

16

12-A

13



Ex Bibliotheca
majori Coll. Rom.
Societ. Jesu

7-12-A-13



IOBI LUDOLFI

Sac. Cæsar. Maj. Consilarii,

DE



BELLO TURCICO

FELICITER CONFICIENDO.

Accedunt

Epistolæ quædam Pii V. Pont. Max.

&

Alia nonnulla ejusdem argumenti.

FRANCOFURTI

Prostant apud Johannem David. Zunnerum.

Anno clc lbc LXXXVI.

SERENISSIMO PRINCIPI
Serenissimæq; Venetorum Reipublicæ

Iobus Ludolfus S. P. D.



Vamvistemeritatis videri possit, *Serenissime Princeps & Patres Conscripti!* consilia de rebus contra Turcas gerendis procul ad vos mittere, præsertim à virtutibus veteris Reip. Romanæ desumpta; quas non solum probè cognitas habetis, sed ipsi quotidie exercetis; attamen studium boni publici, & veneratio amplissimæ dignitatis vestræ, me ad id faciendum induxit. Etenim multis modis Romanos virtute & sapientiâ antecellitis; ut, si exemplum bene & sapienter constitutæ Reip. quærendum sit, nullum toto orbe perfectius
repe-

reperiri possit; idque diuturnitas illius satis demonstrat. Duo enim maxima mala, veram Rerum publ. perniciem dudum vicistis, *invidiam vicinorum, & civium ambitionem*; quorum alterum summâ moderatione vestrâ: alterum optimis legibus superavistis. Nam magnitudinem vestram nemo lividis oculis aspexerit, qui vos exactâ justitiâ uti: & alieni minimè appetentes esse cognovit. Inclyti autem cives vestri, bello & pace clarissimi, maximisque Romanorum ducibus æquiparandi, modestiam excolere, legibus parere, & patriæ suæ statum amare ab ineunte ætate discunt; ut quamvis summi imperii capaces, avidi tamen illius non sint; rarâ animi moderatione. Quippe gloriâ rectè factorum contenti, maximam laudem putant,

trium-

triumphos mereri , non verò affectare.
His virtutibus apud cives vestros valentibus, Rempubl. vestram multò justius & certius, quàm Romanam, (quod bono nomine dixerim) *Æternam* vocare licebit. Faxit Deus O.M. ut bello hoc, quod contra Barbaros feliciter geritis, etiam *Victoriosam* meritò appellare possimus. De qua re nō dubitant, qui *clementiam*, qui *justitiam* atq; *fidem* vestram spectatam habent: Quibus veluti fundamentis innixi non minus feliciter fortunæ imperabitis , ac fluctus maris domare potuistis. *Enimvero mirabili Dei providentiâ in mari fundati, maris imperio, quasi natura duce, destinati estis, ut contra torrentem Othomannicæ potentiæ in ipso mari, tanquam in aliquo flumine,*
fir-

firmissimum aggerē constituatis. Hæc
atque alia talia me impulerunt *Sereniss.
Princeps & Patres Conscripti!* ut &
vobis, & reliquis foederatis, exiguum hoc
opusculum inscriberem, non quòd quid-
quam in eo contineri putem, quod sapi-
entiam vestram, toto orbe celebrem, vel
in minimo fugiat: sed ut majestatem no-
minis vestri reverenter venerarer, certâ spe
fretus, quia ea trado, quæ assiduè agitis,
vos cogitationes meas serenis oculis &
mente benevola contemplaturos esse.
Hoc unum si obtinuero, & me felicem,
& *Sereniss. Vestræ Reip.* perpetuum cul-
torem & admiratorem semper profite-
bor. Valete. Dabam Francofurti ad
Moenum, mense Martio Anno salutis
cdo lcc LXXXVI.



Præfatio ad Lectores.

Quoties bella Turcica exstiterè, privatorum consilia de iis prosperè gerendis hic illic edita fuerunt; neque id illis, tantquam temerarium, obrectationi fuit. Scilicet in magnis calamitatibus obviis cuiusvis consilia æquo animo accipimus & audimus. Sed pleriq; propulsandum modò bellum & defensionis necessitatē cogitantes, de re militari solummodò disseruerunt: & Christianam cum Turcica militiâ comparantes, quibus in rebus Turca nobis superiores, & nos viceversâ illis inferiores simus, docuerunt; disciplinam militarem luxu atq; lasciviâ apud nos corruptam reprehendentes, & socordiam atq; veterum nostrum increpantes, aliâ viâ, aliisq; militibus Turcas aggrediendos esse censuerunt, si incolumes esse vellemus; sicuti videre est ex Busbequii consilio de re militari contra Turcam instituendâ; Lazari Soranzii Othomanno: Achille Traduccio: Iohanne Tarnovio comite: Lazaro Survendio & aliis plurimis. Quorum aliquos Hermannus Conringius cum brevi quadam episcrisi in unum volumen conegessit, & bello superiori An. 1664. imprimi curavit. Quæ ego, aliquò tantùm in appendice nostra specimine dato, in medio relinquere volui, ne idem mihi, quod ab Hannibale, Phormioni Philosopho de officio Imperatoris egregiè differenti, responderetur. Nam ingenia militaria, consilia bellica quamvis præstantissima, à viris doctis ægerrimè admittunt.

At ego mecum reputans aliam nunc rerum faciem esse, & opugnandi atq; vincendi hostis communis egregiam occasionem dari, victoriâque non unius & alterius prælii, sed belli sperare posse; boni publici studio unicè ductus, ea in medium proferre volui, quæ prudentiæ civili, cui ab ineunte ætate deditus fui, convenientiora videbantur; non quid faciendum, sed quid consultandum & perpendendum sit tradens, eaque cuncta viris summis, qui consiliis intersunt, modestissimè submitto. Quandoquidem verò hominum animos ita comparatos esse sciam, ut auctoritati libentius cedant, quàm rationi; quod in consultationibus gravissimis quotidie usuveneri videmus, ubi consilia auctoritate præditorum aliis quantumvis melioribus præpollent, idèò passim dicta & verba clarissimorum scriptorum usurpare volui, citatis etiam locis quorum ab adolescentiâ meâ meminisse potui, ut cognoscant lectores aliorum cæsse.

Exemplis etiam opus fuit, quæ efficaciora ple-

Sall. Cat. 10.

plerumque sunt præceptis; quia rationes vulgò non satis validæ videntur, nisi exemplis confirmatæ fuerint. Ea ex Republ. Romana delongi, cum adhuc integra esset & incorrupta. Nam post devictam Carthaginem, ut ipsi scriptores Romani fatentur, pedetentim degeneravit, ut rebus secundis fieri solet; & imperium ex justissimo atque optimo crudele intolerandumque factum.

P. II. c. 57.

Sed ego primis adolescentiæ meæ annis, cum lectioni Historiæ Romanæ sedulò incumberem, verebar, ne rusticalis Rex vel populus exurgeret, qui iisdem artibus summum in orbe imperium invaderet; præsertim cum apud Superantium legerem, *Turcas orbis terrarum monarchiam semper sibi tanquam scopum suarum actionum propositam habere, ac ob id de invadenda Italia tanquam orbis centro cogitare.* Mox cognitis Turcarum moribus, crudelitate, avaritiâ atque superbiâ infamibus, timorem hunc faciliè deponebam. Neque etiam imaginari mihi poteram, Sultani Vezirios (sic Consiliarios suos Arabico vocabulo appellant) eo infamiz venturos, ut vastissimum imperium, cui regendo vix pares sunt, longiùs adhuc dilatare, & eo ipso plures vicinos, id est, plures adversarios quærere: suo verò Principi, loco divitiarum quibus affluit: & voluptatum quibus abundè fruitur, plures sollicitudines & molestias creare vellent.

Nihilominus ab Imperatore tantæ potentiæ crebræ turbæ, & perpetuæ molestiæ expectandæ sunt, nisi semel ita reprimatur, ut alio tempore lacessere desinat, & jus & æquum continuis vexationibus præferat. Nam ut rectè Busbequius scribit: (*Conf. supra allegato*) multorum in eo stare consilia, ut imminentem capitis nostris pestem non aliter depelli posse credant, quàm pace aut induciis quacumq; ratione cum hoste pactis, itaq; facienda putant omnia, quò in aliquâ parte pacis cum Turcis seu prece seu pretio, seu quacumq; indignitate hæreamus. Itaq; timendum esse, ne avidus imperiî hostis cedendo illectus magis quàm pacatus, ad arma movenda multo ferocior reddatur, & importuno aliquo tempore, cum quantum ille velit cedere nequimus, contra omnes invaleseat. Id verò ne unquam eveniat, opitulante Divino numine, Federati prudentiâ & fortitudine suâ providebunt, atque in eo omnes, rem Christianam amantes, fautores & adiutores, vel saltem supplices apud Servatorem & Redemptorem nostrum habebunt.

DE

DE BELLO TURCICO FELICITER CONF- CIENDO LIBELLUS.

§. 1.



Ardua res est, populos regere, ^{Cap. I.}
sed multò magis ardua, barbaros recens ^{AUTORIS}
victos. Dispar genus, dissimilis lingua ^{SCOPUS}
& mores diversi imperium eorum diffi- ^{& summa}
cile, longè reddunt difficillimum. Quin ^{libelli.}
& vincere sæpè facile est, quàm victoriâ uti, aut victis
imperitare. Quamobrem

Non minor est virtus, quàm quarere, parta tueri.^a
Imo majus dedecus est, parta amittere, quàm omninò
non paravisse.

- ² Grave nunc bellum contra Turcas geritur ; in quo
magna rei benè gerendæ spes affulget. Triplici fœdere
feliciter icto, hostes terra mariq̃ue premuntur. Terror
per omnes illorum provincias ingens : Christianorum
res ubique florentes, Barbarorum verò afflictæ , victo-
riam amplam pollicentur. Ea ut & facilis & matura, nec
non diuturna sit , fortunam virtute juvare oportet ; ne
rursus eveniat, quod superiori seculo, post maximam ^{A. 1571.}
ad Echinadas navalem victoriam , ut Turca nullam ^{Non. Oct.}
aliam, nisi classis suæ jacturam senferit.

^{a)} Ovid. Art. amat. L. II. v. 13.

A

Equi-

Equidem plerique dicturi sunt: *Victoriam melius* 3
retineri non posse, quàm si fractis jam Turcis ad exitium
usque insistatur. Idcirco multiplicandos exercitus, scri-
bendos supplendis legionibus milites, auxilia undique ar-
cessenda: commeatum, arma, stipendia conquirenda:
tributa, quanta possint, maxima exigenda; subditis au-
tem post hæc per otium parci posse. Interea militi ante o-
mnia subveniendum; milites enim esse, quibus solis res
magna efficiantur; bellumque tam diu gerendum, donec
Barbari omnes interneceione deleantur. Sic minimum no-
cituros posteritati.

Verum enim verò experienciâ cognitum est, & au- 4
toritate prudentissimorum virorum constat; *plura in*
bello prudentia & consilio, quàm telis & manibus geri:
& firmiora esse, quæ beneficiâ, quàm quæ vi acqui-
runtur. Arma sanè summo studio paranda, & sedulo
prospiciendum, ne milites cum fame & morbis magis
quàm cum hostibus confligentur: ne etiam stipendia
desint, ut & vivere & disciplinam militarem exactè ser-
vare possint. Sed bello parta, ut fortuna fert, bello faci-
lè amittuntur, nisi prudentiâ stabiliantur.

Plurimum verò refert, ut bellum & maxima vi gera- 5
tur, & tempestivè finiatur. Nam illud tam diu trahere,
donec hostes omnes occidione occidantur, dictu facile
factu difficillimum est. Si enim, ubi semel desponderint
animos, in cædes ruent: illorum desperatio victorias
cruentas, obsidiones urbium longas, si non vanas, red-
det.

Co-

6 Cogitemus, quot oppida munita expugnanda, quot provincia occupanda, quot millia vincenda supersint. Interim consumuntur exercitus, supplementa legionum quotannis reddentur difficiliora: socii, quorum auxilia rara & cara, defatigabuntur: exhaurietur erarium: fatiscunt subiecti ministrandis pecuniis, armis & equis. Ex hostico parum adjumenti; agri hostiles sine discrimine vastantur, ne hosti subsidio sint; neque etiam nobis. Ecclesiastici generis homines autoritate summi Pontificis Viri optimi & innocentissimi, atque de re Christiana indies bene merentis, decimas fructuum suorum crebrius solventes, propacem magis quam pro bello vota nuncupabunt. Fortune quoque meminisse oportet, quæ in bello & præliis maximè dominatur, & inopinatas nonnunquam mutationes affert. ^b Denique casus improvisi, fœdera dissolvere soliti, haud rarò superveniunt. ^c Apud Turcas vis unita, apud nos inter fœderatos divisa: ad hæc res domi non satis tranquilla, & impedita Reip. Christianæ tempora belli finem ancipitem reddere possunt; ut attritis utrimque viribus pax qualicunque præmio componenda sit, exiguo tam immensa potentie damno, quæ cervicibus nostris dira semper & formidabilis imminebit, futuris temporibus, alio Sultano & aliis ducibus, nobis autem forte discordibus, in majus exitium (Christianorum eruptura.

b) Incerti exitus pugnarum, & Mars communis, qui sæpe spoliantem jam, & exultantem evertit & perculit ab abjecto. Cic. pro Mil.

c) Exempla habes apud Thuan. Lib. 50. An. 1571. §. Sed accidit casus. Et lib. 54. Anno 1572. §. Reverso Rom. Urfino,

Id ipsum suo tempore prudentissimè prævidit Sum-
 mus Pontifex Pius V. cum superiori sæculo Principes
 Christianos ad sacrum bellum conjunctis viribus ge-
 rendum sollicitaret; per Nuncios suos in aulis prædicens:
^d *Nisi plane conficeretur Turca, robustiorem semper &
 ferociorem resurrecturum, ignominia & ira animos ex-
 acerbante.* Quam sententiam secuta posthæc Christia-
 norum damna fatis comprobarunt. Igitur non de re-
 cuperandis tantum urbibus quibusdam: nec de profligando, sed de conficiendo bello seriò cogitandum, ut si
 non planè destruat, ita tamen frangatur Othoman-
 norum potentia, ne quid ab ea facile timendum sit Chri-
 stianis. Hæc summa consiliorum esto. Huc omnibus
 viribus incumbendum.

Quapropter non armis tantum terrendi, sed etiam ⁸
 benignitate & clementiâ pelliciendi sunt Turcarum po-
 puli; excutient jugum, si mitius Imperium sperare lice-
 bit. Dedentes se, Græci maximè, pactationibus æquis in
 fidem & clientelam accipiendi. Satrapæ atque præfecti
 deficientes teneant provincias, quibus præfuerunt; ut
 sub clientela victorum suis legibus liberi vivant. Facto
 semel initio, & dato defectionis præmio, sequentur
 plures. Sic divisum in Regulos imperium nunquam
 rursus coalescet. *Cives domi tuti, Barbaros pro muro
 habebunt.* Quâ verò ratione, & quibus compendiis id
 potissimum fieri possit, exponere nunc constitui.

Non

d) Thuan. Lib. L. Ann. 1671. §. Dum Alexandrinus &c.

e) & hoc in mentem venit P. Pio V. qui Ulusalim hoc pacto à Turcis abstra-
 hi posse putavit. Thuan. d. l. 50. Ann. 1571. §. Sub id tempus &c.

9 Non autem sum nescius foederatos sapientissimè rem tanti momenti curare, atque saluberrimis mandatis suos instruere, ut alienis monitis opus non sit. Neque etiam eò temeritatis veni, ut tot magnos viros, quorum consiliis res tantæ geruntur, quidquam docere velim. Multò minùs facultatem mihi sumo, de re militari disserendi, cujus rationem optimè norunt strenui Duces, viri fortissimi, qui illi præfunt; quanquam etiam veterum Romanorum militiam atque disciplinam & præmia respicere non inconsultum foret.

10 At dantur aliqui rerum agendarum ministri, suis ferè commodis intenti, qui lubrici vel iræ magis confidunt, quàm causæ communi & Reipubl. salutis. Isti sæpissimè admonendi, hortandi & aliquando objurgandi sunt, ne à tramite sanctissimorum præceptorum, quæ à superioribus suis accipiunt, latum unguem discedant. Huc pertinet, quod S. Ludovicus Galliae Rex Filio suo inter alia in mandatis olim dedit: *Sapè specta, ait, quid Bailivi, Praepositi, & alii Officiales tui faciant, & in eorum actus inquire, ut, si quid corrigendum sit, corrigas.*

11 Non quidem dubito fore multos, qui existiment, me vetera afferre, nec à me reperta, sed pridem nota. Fateor lubens, sed nunquam satis inculcata, nec unquam satis observata. Qui, si putaverint vi & armis imperia celerius acquiri quàm consiliis, ut quondam Pyrrhus

A 3

rhus

f) Ex vita S. Ludovici & quidem ex actis Collegii Rationariorum Parisiensium.

Flor. I. c. 18. Ithus Epirotarum Rex dixerat : *Facile sibi fore Orbis imperium occupare, se aut Romanis Rege, aut sibi Romanis militibus*; illi confiderent obsecro, quæ M. Porcius Cato, vir summæ claritudinis, in senatu de sua Republ. dis-

Sall. Cat. 52. feruit : *Nolite existumare*, inquit, *Majores nostros armis Rempubl. ex parva magnam fecisse, si ita esset, multo pulcherrimam eam nos haberemus; sed alia fuere, qua illos magnos fecere; domi industria, foris justum imperium, animus in consulendo liber, neque delicto neque lubrici obnoxius. Pro his nos habemus luxuriam, atque avaritiam, publicè egestatem, privatim opulentiam; laudamus divitias, sequimur inertiam, inter bonos & malos discrimen nullum, omnia virtutis premia ambitio possidet.* Ipse Sallustius, qui ista memoriæ prodidit, rerum patriarum optimè gnarus, cum parva civitatis suæ initia, bella cum opulentis Regibus feliciter gesta, animo agitarer, *gloria belli Gallos ante Romanos fuisse fateretur*; ast civium suorum egregiam virtutem cuncta patravisse. Audiamus Ciceronem in Senatu verba facientem : *¶ Quam volumus, licet, P. S. ipsi nos amemus; tamen nec numero Hispanos, nec robore Gallos, nec calliditate Poenos, nec artibus Græcos, nec denique hoc ipso hujus gentis ac terræ domestico nativoq; sensu Italos ipsos ac Latinos, sed PIETATE AC RELIGIONE, atq; hac una sapientia, quod Deorum immortalium numine omnia regi, gubernariq; perspeximus, omnes gentes, nationesque superavimus.*

B. Catil.
c. 33.

Pro-

g) Orat. xxx. De Harusp. resp. §. Deinde etiam &c.

12 Profecto non arma, non exercitus Attalum Pergami: ac Nicomedem Bithyniæ, & alios non nullos Reges induxerunt, ut populum Romanum Regnorum suorum hæredem scriberent. ^h Non milites Ptolemæum Ægypti Regem impulerunt, ut Quirites Filio suo tutores daret; ⁱ sed innocentia, integritatis atq; justitiæ fama effecit, ut gentium Reges, duces, populi, nationes præsidia sibi ab hac urbe peterent. NULLA ENIM UNQUAM RESPU- Flor. 2, 7, 8.
BLICA NEC MAJOR NEC SANCTIOR NEC BONIS EXEMPLIS DI- Liv. I. in
TIOR FUIT; Quis ergo miretur, his moribus Romanos Exord.
Flor. I, 18.
maximum in terris imperium, & nomen æternum sibi paravisse.

13 Horum ego præcipuas virtutes CLEMENTIAM, JUSTITIAM, & FIDEM perpetuæ commendationis & præclaræ FAMÆ fundamenta repræsentabo, non meis, sed illorum ferè verbis & exemplis, quibus plerique magis moventur, quàm præceptis.

14 Non dicam nunc, quanta pietate Deos suos coluerint: quàm sollicitè in bellum ituri eos placare, & malefacta suorum expiare fas habuerint: quantoque studio feliciter reversi supplicationes ad pulvinaria eorum decreverint. idque in tantis tenebris; quid facturos eos putandum est, si divina religionis luce, sicuti nos, usi fuissent?

15 Quod si homines Ethnicisive utilitatis sive vanæ gloriæ studio virtutes illas excoluerunt, quanto magis Christianos id facere decet, qui tot nominibus obstricti & obligati sunt, justitiam, lenitatem & mansuetudinem

erga
h) Liv. Epit. 58. & 93. Flor. 2, 20. Justin. 36, 4. 5. & 39, 5, 2. Jornand. de success. Re.
i) Val. Max. 6, 6, 1. (gnor. c. 55.)

erga quoscunque mortales exercere. Hæc ego compello, hos mihi studiisque meis æquiores fore spero, ut si non tantis conatibus, attamen Christianæ religioni & charitati congruentia dixisse me pronunciaturi sint.

Cap. II.
DE CLE-
MENTIA.
Tac. H.
4, 63. 2.

NOVUM Imperium inchoantibus §. I
utilem esse clementia famam, præstantissimus Historicorum asseruit. Verùm non utilis tantum, sed & necessaria est CLEMENTIA tam firmando novo regno, quàm parandæ victoriæ; modò terrori armorum rectè misceatur. Est enim in bello perpetua quædam electio minoris mali, ubi crudelitas cum jactura rerum omnium timetur, gladii animose stringuntur: ubi verò certa salutis spes est, nemo vim armorum experiri voluerit. Cur enim armis vitam & libertatem tuerentur subiecti, quæ ultrò relinquuntur? Cur templa atq; delubra defenderent, quæ nemo violaturus est? Cur sacra propugnarent, quæ non oppugnantur? Cur fortunas suas omnes periculis exponerent, quas salvas habere possunt? Cur iras retinerent contra hostem quem placabilem sibi fore sciunt?

Clementia quidem in pace per omnes Imperii partes longè lateque se diffundit; in partem humaniorem semper inclinat: poenas rigidiores mitigat: dato in paucos exemplo multitudini parcit: parvis peccatis veniam, errantibus misericordiam accommodat: pravos civium mores

mores exemplo magis quàm mulctâ corrigit. & sic benevolentia multitudinis animos devincit. Qui verò timeri tantum volunt eos vicissim timere oportet, infelici & inquieto prorsus imperio, quia *nulla vis imperii tanta est, quæ premente metu possit esse diuturna.* Cic. off. 2.

3 At sicuti clementia in pace delicta civium minora aut ambigua respicit, ita in bello miseriam afflictorum; domi laudabilis, foris necessaria, si & vincere & victoriâ frui velimus. Etenim nulla major calamitas bello, vita, libertas, uxores atque liberi, sacra & profana omnia, in victorum manu sunt; Cædes, incendia, sacrilegia, stupra, & quæcunque improbis militibus collibuere, nullo neque modò neque fine patrantur; noxiis atque innoxiiis, idem exitus; armati pariter atque inermes cadunt non sexus, non ætas miserationem affert. Ubi autem summa sæviendi licentia, ibi maxima clementiæ occasio est.

4 Itaque Principes supremo loco constitutos Deum imitari, hominumque misereri decet; neque enim *nulla aliare propius ad Deum accedunt, quàm salutem hominibus dando.* Istud admirationem maximam apud cives, Cic. pro Li-
gar. in fin.
spem apud victos, fiduciam apud deditos affert; cum vident victorem de jure suo tantum remittere, ut mala quæ inferre possit, omittat: & bona quæ auferre possit, relinquat. Tantam magnanimitatem populi suspiciunt, odia sensim ponunt, & spem bonam concipiunt, ut victorem pro vindice; & domitorem pro datore li-

B

ber-

bertatis agnoscant. Quippe clementia tacitâ quadam vi animis hominum sese insinuat, & arma ferocissimorum manibus sensim quasi extorquet; prorsus sicut de Sole fabula fert, qui calore suo leni hominem vestibus spoliavit, quas ventus maximo impetu abstrahere non poterat.

Claud. Pan.
Mall. i. 238.

- - - - Peragit tranquilla potestas
quod violenta nequit - - - -

Tac. Ann.
2, 10, 1.

Sall. Cat.
c. 12.

Id. c. 9.

Nullam certè virtutem Romani ambitiosius jactaverunt, quàm *paratam in deditionem venientibus clementiam*, quòd scirent nullam parando imperio potentiorē esse. *Religiosissimi mortales illi, victis nihil quidquam, prater injuria licentiam eripiebant.* Pace autem factâ, *beneficiis magis quàm metu imperium agitabant, & accepta injuria agnoscere quàm persequi malebant.*

At inter illa, quæ hominibus sunt carissima, AVITA RELIGIO facile principem locum obtinet, pro qua mortem obire parati sunt omnes, qui illius non sunt contentores. Etenim quibus cœlestia terrestribus potiora sunt, vitam prius quàm illam deserent. Ista, mentibus hominum penitus infixâ, vehementissimum est fortitudinis incitamentum: pro ea vel vincere vel mori gloriosum. Hæc si hostibus intacta relinquatur, plurimum decedet ardori pugnandi.

Sacra gentium prisci Romani nunquam violaverunt, quanquam à suis essent alienissima; nisi gentem totam à stirpe delere vellent, tunc enim sacra & profana eandem

eâdem ruinâ involvebantur, uti Carthagini accidit. *Vidimus* (Locrenses dicebant illis in Senatu) *cum quantâ ceremoniâ non vestros solum colatis Deos, sed etiam externos accipiatis.* ^k Pompejus, qui Romanorum primus Judæos domuit, templum eorum jure victoriæ ingressus est; contentus eo, quod nullam intus effigiem viderit. Muros Hierosolymorum diruit, delubrum mansit, ut Tacitus loquitur. Neque posthæc Romanorum curiositas eò procescit, ut cum indignatione Judæorum inania adyta rursus spectare vellent. Quin potius illis permiserunt, ut templo suo alienigenas, ipsosque Romanos rerum Dominos arcerent. Orto deinde ferali illo & internecino bello, Judæi omnes perire, quàm facris cedere maluerunt. Sic erat in fatis, aliàs ancipitem Romanis, quamvis tunc potentissimis, victoriam redde-
dere potuissent. Hist. V. 9. 1.

8. P'asim à Romanis culpantur illi, qui adversus Deos cujuscunque nationis grassarentur, eorumq; fana spoliarent, ac pecunias sacras diriperent. Nec rei quicquam feliciter geri posse putaverunt, priusquam tale scelus expiatum esset; verentes, *ne qui id piaculi commisissent,* Liv. 39, 18.
id non suo solum sanguine, sed etiam publica clade luerent. Et si sacrilego ex alia causa adversi quid contineret, illi id crimini perpetrato tribuebant. Veluti cum Q. Fulvius Flaccus ob gravem luctum metumq; amens

B 2 factus

k) de Alba à Romanis dirutâ Liv. L. I. c. 29. Publica privataque te&ta solo æquata; Deûm tamen templis temperatum est.

Liv. 2. 28. factus esset, vulgò *Junonis iram ob spoliatum templum alienasse mentem* ferebant.

Liberum quidem est Regibus & quicunque tutores sunt status alicujus publici, patria sacra tueri, & peregrina prohibere; quod & Romani factitaverunt. *Ast apud deditos reperta violare, servum atque invidia plenum habetur: semel autem admissa, pactisque & pollicitationibus firmata, per vim mutare, gravi mala fidei nomine traduci solet.* Dantur aliæ artes sat multæ tam bonæ quàm malæ, quibus gentis alicujus sacer cultus stabiliri vel pessundari potest, ut nullâ vi opus sit.

Quin & vera religio tam asperis remediis non eget, 10 veritate & sanctitate suâ ipsa sese commendat, modò doctoribus securitas: auditoribus verò facultas præstetur illam liberè amplectendi. Id enim solum à summa potestate exigitur. *Verbis potius quàm verberibus res agenda;* ut Lactantius ait.

*L.V. Div.
Inst. c. 28.
App. N.I.*

2. Cor. 10. 4

1. Tim. 4. 2.

Prædicare & persuadere Ecclesiasticorum est, non cogere; scilicet istius militia armæ carnalia non sunt. Ad hos pertinet dictum Apostoli:

Prædica verbum, instæ opportunè, importunè, argue, ob-

secra, increpa in omni patientia & doctrina. Qui igitur

converti nolunt, sibi imputent; exitii eorum culpam

Reges & Principes non sustinebunt, sic opiam salutaris

doctrinæ illis abundè fecerint. Christus Apostolis suis, ad

prædicandum Evangelium misis, nihil aliud injunxit,

quàm *ut foras de domo vel civitate exirent ubi non reci-*

perentur, & pulverem de pedibus suis excuterent. Sen-

sim

Matth. 10. 4

sim instillanda sunt fidei mysteria. *Lac* secundum Apo-^{1. Cor. 3, 2.} stoli præceptum talibus præbendum, non esca, adhuc enim carnales sunt.

11 Utique toleramus *Judeos*, occultæ in sacratissimum Jesu nomen blasphemix reos; & criminationis in sanctissimam ejus matrem manifestos, & tamen æquis oculis illos aspicere, atque cum illis conversari & negotiari sustinemus. Non eousque procescit *Muhammedis* impietas, qui & honorem *maximi Prophetæ Salvatori* nostro tribuit, & *Evangelium* illius comprobavit. *Eum enim Messiam* vocat, *Legatum Dei* & *verbum* & *spiritum ejus*.¹ Quamobrem *Musulmanni* illum venerantur, ac ob id *Evangeliorum librum* fortè acceptum in caput attollunt, & sic more suo honorant. Qui si convinci possent, nullum aliud Evangelium in toto terrarum orbe extare, nec unquam extitisse, quàm quo Christiani in hunc usque diem utuntur, næ magnam conversionis spem de illis concipere possemus.

12 Quòd si Muhammedanis fidem faceremus, sacra illorum armis neutiquam peti, sed *Turcarum* sædam avaritiam & inmanem injustitiam, maximamq; in Christianos servitiam belli causam esse, certè illorum amici per Asiam atq; Africam sparsi, tardiores ad opem ferendam

B 3

red-

1) Sic enim in Alcorano Sur. IV. circa finem de illo loquitur: المسيح عيسى ابن مريم رسول الله وكلّمته وروح منه *Messias Jesus Filius Maria Legatum Dei & verbum ejus & spiritus ex eo.* Et Alcoranum suum مصدق التوراة والإنجيل *verificantem Legem & Evangelium passim prædicat vaser ille.* Sur. III. in pr. Sur. IV. & al.

1.5.

redderentur: neque ad auxilia, tanquam ad commune incendium restinguendum, confluerent. Istud supra laudati Pontificis Pii V. prudentissimum consilium fuit, qui non dubitavit, literis ad *Schah-Tecmassem* Persarum Regem & *Scherif Mutahar* Arabiæ principem datis, eos ad societatem & fœdus cum Christianis ineundum hortari, *odium religionis minimè allegans*, sed *Turcas tanquam communem orbis terrarum pestem extinguendos*, scribens. Canes illos vocamus; sunt tales, dum modo nobis pareant; utamur illis pro molossis, custodiendis ovibus & abigendis lupis voracibus. *Oppidò falluntur, qui oves ovibus defendere volunt; non multò sapientiores iis, qui hortos & arva, non damis & vepribus, sed rosis & myrtis sepire sat agunt.*

Liv. 43, 18.

Verùm in tanta re ad victoriam consequendam efficacissima, de qua multò plura dici possent, longiùs progressus sum, nunc ad reliqua pergo, quæ homines maximè amant, qualia sunt VITA, UXORES & LIBERI, denique BONA atque LIBERTAS. Populi liberi, qui suis legibus atque institutis utuntur, nihil omnium bonorum libertate gratius habent. Gnarum id Romanis, qui victo Philippo Macedonum Rege, Græcorum civitatibus libertatem ac suas leges permiserunt, ut eas in bello, quod contra Antiochū moliebantur, faventes haberent, uti mox pluribus dicemus. Cū ejuscemodi populis haud
ira

- m) XV. & XVI. Cal. Xbris 1571. Thuan. Lib. L. d. anno. 9. Sub id tempus.
n) Thuan. d. l. Plura de hac re vide in App. hujus Libelli. N. II.

ita faciliè transigitur. *Nisi forte divitiis effœminati servitutem libertati opibusque suis præferre malint; quippe libertas in paupertate rectius æstimatur & acrius defenditur.* At qui dominationi unius subsunt, ejusque arbitrium pro lege habent, faciliùs transeunt, modo vim & metum mobilitati suæ prætexere possint. Tales sunt Turcarum subjecti, quibus, si vita & bona cum sacris salva relinquantur, ingruentibus armis & ostentata minoris imperii spe, haud diu deliberabunt quid faciendum sibi sit.

- ¹⁴ Quin etiam in urbium expugnationibus & præliis arma abjicientes servandi sunt, ne barbaram sævitiam, quam in hostibus tantopere odimus, ipsi exerceamus: aut omni salutis spe demtâ, illos fortius pugnare cogamus. Hic milites clamabunt: *reddendam vicem barbaris in Christianos semper atrocibus: nihil opus captivis, quos custodire operosum & alere onerosum foret.* Attamen cultiorum populorum moribus ipsique humanitati multò convenientius est *arma ponentes servare, cosque captivos abducere.* Quod ut ab irato milite obtineatur, revocanda sunt servitutum jura, mercatoribus Christianis potestas facienda capto semendi & vendendi, ut per agros vastatos distribui, contumaciores verò & robustiores ad triremes mitti possint. Nam

Vendere cum possis captivum, occidere noli

Serviet utiliter &c.

Hor. I. Ep.

17. 14.

Sic datâ spe pretii, *avaritia militum pro clementia erit.*

Ne

Ne verò victi vitam inopem morte pejorem putent, tantum bonorum relinquendum est, ut commodè vivere possint; neque militibus indulgendum, ut prædas & rapinas contra deditos exercent. Id verò est, quod ab illis difficillimè obtinebitur, *suis enim laboribus atque vulneribus bona de victorum hostium deberi putabunt, modo sibi pecunia illorum concedatur, clementia & beneficentia gloriam se ducibus faciliè relicturos.* Huic rei alio pacto consulendum, & stipendia exactissimè solvenda, ut neque apud socios, neque apud deditos prædas quærant, neque illis magis quàm hostibus metuendi sint; sed apud barbaros contumaces, vel perfidos, qui clementiam victoris spernentes, inclementiæ militum justissimè obijciuntur.

Cap. III.
De JUSTI-
TIA.

U*T autem clementia in subigendis:* 1
ita JUSTITIA in retinendis hominum animis plurimum potest. Omnis enim imperandi parendique ratio in spe & metu posita est. *Spes fiduciam parit; Fiducia amorem. Metus verò reverentiam conciliat.* Sed ista rectè temperanda sunt, si stabile atque perpetuum imperium nobis exoptamus. *Solus amor in contemptum: terror & metus in odium facile vertunt.* 2

Cùm autem in omni Republicâ boni & mali dentur, remedia adhibenda sunt, quibus utrique in officio contineantur. Id verò nullâ rem magis quàm *exactâ justitia*

tia effici potest, quæ his perniciem, illis salutem affert. Est enim *societatis humanae vinculum & fundamentum. Pacis fulcrum & tranquillitatis publicæ stabilimentum. Omnium Domina & Regina virtutum.* Nec alia potior Cic. Off. 3. causa, cur homines in societates coiverint. Justitiæ obtinendæ causâ Reges olim creati: Respublicæ constitutæ; quæ illâ haud magis carere possunt, quàm corpus animâ. *Sine illâ regna nil sunt nisi publica latrocinia,* August. de Civ. Dei. eaque amota brevi corruunt atque dissolvuntur. Imò *ne sceleratorum quidem societates diu sine justitia stare possunt.* Objustitiam nonnulli in Deorum numerum ab Ethnicis relati fuerunt: ob eam *Principes* in sacris libris *Dii in terris, & filii Excelsi* vocantur.

3. *Nullum quidem tempus justitia vacare debet,* at in Cic. Off. 1. bello atq; victoria tantò major est illius splendor, quantò minus injustitiæ ratio reddi solet; præsertim initio motuum, ubi bona causâ nostris animum addit, hostibus demit. Nullam virtutem magnificentius extulerunt Romani, & nullam efficaciorē proferendis imperii sui finibus experti sunt. Nullum illi *bellum justum* censuerunt, nisi quod aut *rebus repetitis* gereretur, aut *denunciatum* antè fuisset & *indictum.* Cic. Off. 1.

4. De defensione, quæ juris naturalis est, aliisque justì belli causis, multa hîc dicere nihil attinet. At si res bello repetere velimus, necesse est, ut liquidò constet, eas nobis in pace vel vi vel dolo priùs fuisse ereptas. Nam

C

bona

o) Ne illi quidem, qui maleficio & scelere pascuntur, possunt sine ulla particula justitiæ vivere &c. Cic. off. 2.

bona ab aliis sine contradictione nostra longo tempore possessa, vel longissimo silentio nostro pro derelictis habita, nec ulla in pacificationibus eorum mentione facta, armis vendicare, id non est sua repetere, sed aliena rapere, cum maximo justitiæ & bonæ existimationis detrimento.

Ann. VI. 31.

Artabanus Parthorum Rex, referente Tacito, vi-vo Germanico Romanis fidus, illo mortuo superbiam in illos, & servitiam in populares sumpsit, fretus bellis qua secunda adversum circumjectas nationes exercuerat, senectutem Tiberii ut inermem despiciens, avidus Armenia, cui filium Arsacem imposuit, addita contumelia & missis qui gazam à Vonone relictam in Syria Ciliciaque reposcerent: simul veteres Persarum ac Macedonum terminos, seque invasurum possessa Cyro, & post Alexandro, per vaniloquentiam & minas jaciebat. Nul- lum hic vitium omissum est, quod talem animum, qua- lis Artabani fuit, exercere solet. Deposito metu ob bel- la prosperè gesta superbiam & arrogantiam induit con- tra externos, & servitiam contra suos: illis fidem, his ju- stum & æquum imperium debebat, quorum neutrum præstitit, sed utrumq; violavit: simul animum detexit, avidissimum pariter ac vanissimum, ut videret filium suū Armeniæ, quæ ad illum non pertinebat, dominantem: obsoleta atq; plane detrita jura ex orco resuscitaturus, à majoribus suis nunquam possessa, multo minus exerci- ta aut retenta. Quasi verò Cyrus & Alexander majores
illius

illius fuissent, quibus ille non interruptâ ferie successisset: aut illi jura sua post tot bella, pacificationes atque mutationes, apertâ animi sui significatione semper facta tecta reservassent, atque illibata ad posteros transmisissent. Barbari hujus Regis exemplo facile dignosci poterit quid sit res suas repetere, aut vetera & inania per vaniloquentiam poscere; quod injustissimum pariter & contumeliosum censendum. *Contumelia autem injuria addita, animos magis exasperat.*

- 6 Artabano similis fuit *Solymanus Turcarum Sultanus*, qui cum aliquando de Italia invadenda tractaret, ipsamque Romam in animo haberet, stultè sanè (ut rectissimè scribit Superantius) dicere solebat: *eam jure ad imperium Othomannicum pertinere, quòd à Constantino M. in præjudicium successorum fuerit alienata.* De Imper. Turc. P. II c. 57.

- 7 Egregiè hac de re disseruit Ludovicus Gonzaga Niverniensium Dux cum de Pinarolio & Saviliano Sabaudis restituendo superiori seculo apud Regem Gallix ageretur. *Si Principes, ait, quæ à Majoribus usurpata possident, restituere teneantur, ad summas angustias plerisque, qui nunc latè regnant, redactum iri.* Thuan. L. 59. A. 1574. Addit, *si hoc valeret, quid à Pontifice, Hispania Rege, Venetis, Sabaudis, ipsisque Gallis reposci possit.* Sanè totius orbis imperia inverti & perverti necesse esset, si titulos antiquarum possessionum edere deberent Reges atque Principes. Quod si quis id præsentis fortunæ confusus tentare vellet, nonnetimendum haberet, ne idem ab illo, posterisque

ejus aliquando exigatur? cum æquissimum sit, *quod quisque juris in alium statuit, ut ipse eodem jure utatur*. Ne privati quidem titulum tenentur edere possessionis suæ, ^p quantò minus principes, vel ordines liberi, qui principum jure utuntur. Et si Reipubl. interest, *ne privatorum dominia sint in incerto*, multo magis pacis publicæ, ne reposcantur tanquam sua, quæ quis ultra hominum memoriam pro suis non agnovit. Tantum de rebus repetundis.

Alterum justî belli requisitum est *denunciatio*. Et-⁸ enim feciali populi Romani jure sanctissimè præscriptum fuit, ut bellum priùs alteri parti denunciaretur; quod & cultiores populi semper laudabiliter fecerunt, & maxima ratione nritur. Qui enim bellum alteri indicit, causas simul manifestare tenetur; quod facere non dubitant ii, qui causæ suæ fidunt. Subdoli tacent, ne iniquitatem suam loquendo magis patefaciant; adeoque sese impudentiâ contra jus & fas muniunt, nullâ idoneâ ratione fulti, modò cupitis potiantur, quicquid in buccam venit jaciunt; ut de Artabano modo memoravimus. frustra sperantes, simplicioribus glaucoma, prudentioribus arma objici posse; illi, ut quod viderint, non viderint; hi verò, ut credere & dicere cogantur, quod ipsi velint.

Inest tamen mortalibus recti praviq; sensus, qui ^{non}

- p) Notissimi juris hoc est, & optimâ ratione suffulti. Id petere *incivile* dicunt leges. l. cogi ii. C. de petit. her. & *nimis grave*; *quislibet enim intentionis suæ proprias afferre debet probationes*. l. 7. C. de testib.

non argutiis Sophistarum aut Legulejorum interpreta-
mentis nititur, sed omnium pectoribus penitus inscrip-
tus est, ut nulla neque vi neque arte everti possit.
Si verò adulatione aut vi prematur, apud posteros erum-
pet. Satis arduum est in magnis Imperiis, innocentiae
famam à malevolorum obtrectationibus vindicare;
nam potentiores etiam si justè agant, injuriam facere vi-
dentur, pravà multorum consuetudine pleraque illo-
rum acta in deterius trahendi, quasi nihil æqui facere
vellent, qui iniqua omnia impune facere possunt.

10 Tanto magis excelsum & generosum animum de-
cet, actiones suas omnes exactà justitiæ trutinà ponde-
rare; nihil cupere, quod non æquitati consentaneum sit;
aliena autem minimè omnium appetere. Omnia posse,
sed non omnia exsequi. In pactorum interpretatione
sensum communem sequi; uti mox de bona fide dice-
mus: Victorià, quod quidem difficillimum est, non su-
perbè nec avarè uti. Si pecunia promissa solvitur, non
gladium iniquo ponderi apponere, uti insolens ille re-
Liv. 5, 48.
gulus, Brennus Romanis fecit. Vel si coria boum pen-
denda sint, non terga urorum deligenda, ad quorum Tac. An. 4,
normam præstentur; sed potius æquitas, lenitas & mo-
72, 2.
deratio omnibus aliis commodis anteponenda.

Hoc animos hominum ad admirationem & obse-
quium illorum, qui summæ rei præsumunt, alliciet; ad ta-
lem Principem tanquàm ad commune asylum populi con-
volabunt: Illius fidei seq; resq; suas omnes sacra pariter &

C 3

pro-



profana committent. Ut multò justius quàm Pyrrhus

L. II. Rex exclamare possumus. *O quàm facile Principi cui-
dam foret, orbem terrarum subigere, si aut ipse omnibus
promptam & incorruptam justitiam administrare, aut
ministros, qui id constanter faciant, habere posset. Hoc*

Off. 2. est, quod Cic. de Pop. Rom. prædicavit, *Quamdiu, in-
quit, imperium populi Rom. beneficiis tenebatur non in-
juriis; bella aut pro sociis, aut de imperio gerebantur: exi-
tus erant bellorum aut mites aut necessarii. Regum, po-
pulorum, nationum portus erat & refugium Senatus.
Nostri autem magistratus, imperatoresque ex una hac re
maximam laudem capere studebant, si provincias, si so-
cios aequitate, & fide defendissent. ITAQUE ILLUD PA-
TROCINIUM ORBIS TERRÆ VERIUS, QUAM IMPE-
RIUM POTERAT NOMINARI.*

Infani profecto sunt illi, qui solis privatis justitiæ: **11**
principibus verò utilitatis rationem habendam censent.
Quasi verò justitia non in universum utilis sit, dum vete-
res populos coercet & novos conciliat. Scilicet, suos
cum laude regere, cum vicinis pacatè vivere, & nullo ne-
que domi neque foris metu rebus suis tranquille præesse,
improbis illis humani generis turbatoribus nulla utilitas
esse videtur, nisi novas provincias faciant, & terminos
Tac. 15, l. 6. imperii sui sine fine dilatent. Hi sunt, qui in summa for-
tuna id æquius putant quod validius. Sua retinere pri-
vata domus, de alienis certare regiam laudem esse.

Quibus etiamsi concedamus, quosdam injustitiæ: **12**
com-

committendæ casus peritiles dari posse; id tamen summæ rei plus nocet; nam famam lædit: odium apud exteros parit, & amorem apud nostros minuit; quæ perniciosissima sunt imperantibus. Eam ob causam Athenienses ex consilio Themistoclis classem Lacedæmoniorum in cendere noluerunt, quamvis id ad obtinendum maris imperium, de quo tunc certabatur, valde conducibile videretur. Val.M. 6,5.

13 Tametsi sceleratis istis regnare maximum injustitiæ pretium videatur;

Nam si violandum est jus, regnandi gratia

Violandum est, aliis rebus pietatem colas.

Cic. off. 3.
ex Eurip.

id minimè tamen expedit, inimici innumeri, odium plurimorum, & ex conscientia pravâ metus, alieni juris possessionem planè turbulentam & infaustam reddunt. Quæ ergo voluptas, quæve utilitas ex malè partis potest esse? ut taceamus & vetera & recentia exempla eorum, qui hanc regnandi cupiditatem suo suorumq; sanguine, & fortunarum omnium amissione expiarunt: paucissimi regnum malè partum ad secundum vel tertium heredem transmiserunt.

14 *Justitiæ tam arctè conjuncta est* Cap. IV.
De Fide.
FIDES, ut una sine altera esse non possit: & apud auctores Romanos unum pro altero frequenter ponatur. Nam vir justus fidem nunquam fallit: & qui fidem amat, justitiam nunquam deserit. Objecto tantùm differunt.

ferunt. Justitia enim latior est, & omnes actiones cum aliis secundum jus & fas fieri vult, quamvis nulla promissio præcesserit.

Fides autem est dictorum & pactorum veritas & sincera observatio. Quam tam sanctè coluerunt Romani, ut ne quidem acerrimi illorum hostes hac in parte quidquam illis exprobrare potuerint. Jugurtha Numidiæ & Mithridates Ponti Rex, profundam avaritiam, injustitiam & imperitandi libidinem illis objecerunt, perfidiæ ne leve quidem indicium proferre quiverunt.

Sall. Jug. c.
81.
Id. Hist. IV.

Cic. Off. I.

Non afferemus nunc privatorum exempla; Reguli, qui maluit ad supplicium redire, quàm fidem hosti datam fallere. Fidem publicam, etiam cum detrimento suo sacrosanctam habuere; quâ datâ Reges tametsi male sibi conscii Romam venire non dubitaverunt.

Sall. Cat. 10

Val. M. 9, 6

Sall. Cat. 51

Nullâ rem magis crevit Respubl. Romana. *Carthago* contrâ, imperii Romani, non verò virtutum æmula, à stirpe interiit. Erat enim Carthaginensium summa improbitas, ita ut *Fides Punica* pro ipso perfidiæ fonte haberetur. Nam in pace & per inducias multa nefaria facinora patrabant, qualia Romani nunquam per occasionem fecerunt. At illi variis prætextibus vicinorum jura carpentes, quidquid luberet, sensim ad se trahebant. quare sibi novum bellum & tandem exitium acceleraverunt. Nisi enim pactorum fides servetur, bella recrudescere oportet; quæ contra perfidos multò acerbius geruntur, & longè difficilius extinguuntur. fide, pacis atq; concordix fundamento, sublata. Cæ-

5 Cæterum nemo facilè tam perfictæ frontis est, ut fidem apertè frangat; Prætextus quærentur, quibus data fides irrita reddatur. Fœdifragi quidem sunt aliqui, sed videri nolunt. Ast qui bona causâ deest, dolis atque fallaciis contendunt: fœdera pro lubitu suo interpretantur, ut cupidinem imperitandi expleant. Interdum etiam figmentis utuntur, & innocentes atque pacificos calumniantur, ut Lupus agnum, quod priores hostilia fecerint. Jugurtha parte Numidiæ non contentus, occiso fratre Hiempsale, illum *à Numidis ob sævitiam interfec-* Sall. Jug. 15.
etum fingeat: & cum alterum fratrem Adherbalem quoque peteret, qui quietus, imbellis, & placido ingenio erat, *eum dolis vitæ suæ insidiatum* mentiebatur. Sall. Jug. 21.
 Perseus ultimus Macedoniæ Rex, cum à Consule Romano argueretur, quod contra fœdus his bellum intulerit, illis auxilia miserit; *jure gentium id factum* causabatur, Liv. 52, 41.
ut arma armis propulsaret. Ita factis perfidi, dictis plerumque sunt mendaces.

6 Turcarum fidem multi quidem laudant, eamque exemplis quibusdam docere conantur. Si verò acta eorum penitiùs inspexeris, sublestat eam aliquoties cognosces; nimirum mali multoties boni sunt, ut semel cum lucro pessimi esse possint. 9 Exemplo sint Christiani, quibus libertatem sacrorum suorum verbis quidem pollicentur, re ipsa verò imminuunt, & per cuniculos, quæ possunt, subruunt; ut in toto Oriente, speciatim in

D

Ægy-

q) I cattivi sono molte volte buoni, per esser una sola volta importantemente cattivi.
 Malvezzi.

Ægypto videre est, ubi nil nisi exiguæ Christianismi reliquæ supersunt. Inducias more Carthaginensium rarò sincerè servant, turbidos juvant; trahunt, rapiunt, quæ commoda videntur. Interim clamant, ut illi quondam,

Jer. 6, 14. *Pax, pax, & non erat pax.*

Quamobrem bona fides à mala meritò distinguitur. Bona fides argutiis rabularibus non utitur, non verba conventorum, sed mentem spectat: non suam, aut à nasutulo quodam excogitatam, sed simplicem & passim obviam interpretationem sequitur. Si verò ea verè ambigua sit, colloquia & arbitria bonorum virorum non detrectat, multò minùs eludit. Argumentis prius, quàm armis, quamvis potentior sit, sententiam suam defendit. Cùm enim duo genera decertandi sint, unum per disceptationem, alterum per vim, cumque illud proprium sit hominis hoc belluarum, non confugiendum est ad posterius, quamdiu uti licet priore.^r

Cic. Off. I.

Enimverò non tantùm erga externos aut hostes fides inviolabilis esse debet, sed multò maximè erga eos, qui potestati nostræ subsunt, quibus fides tantò accuratius præstanda, quantò minus iniquitatem nostram ulcisci possunt. Nec id tantùm illorum, sed nostri potius causâ. Quis enim fidem habebit illi, qui suis fidus non est?

Victoriæ nihil magis obstat, quàm mala fides. Frustra de amplificando imperio cogitat, cujus fides est
su-

r) Omnia prius consilio quàm armis experiri sapientem decet. Ter.

suspecta. Nemo enim se suaque cara pignora, fortunasque suas subjiciet illi, cui fides publica vilis est, qui pacta conventa, privilegia atque promissa indies mutat & subvertit.

10 Quanquam autem fidem publicam æquipollere oporteat juramento, si tamen expresse additum sit, tantò sanctius erit servandum, quantò minus exceptionibus uti licet, ubi summum numen in testimonium & cautionem quasi adhibetur. Nihil hic pectore clausum teneri potest, quod scrutatori cordium non sit apertum: nihil tacitis conditionibus tectum, quod non in apertum producere & vindicare possit. Etenim nemo sibi sed alteri jurat; ideò non nostra sed alterius mens & verba spectanda, nisi juramentum profanare, & nos odio generis humani, & ultioni divinæ subjicere velimus, quæ non rarò posteros, totamque familiam atque gentem manet.

11 Josua & procures Israëlitarum, quamvis dolo decepti, jusjurandum Gabaonitis præstitum servarunt, adhibita tantum aliquâ doli poena; scilicet negotium ita comparatum erat, ut etiam absque illo & licite promitti & honestè præstari posset. Cui cum Saulus Rex multò post tempore contravenisset, gravis poena & domum ejus & totum Israëlitarum populum secuta est. Jof. 9, 19. 2. Reg. 21, 1.

12 Maxima autem semper apud omnes gentes fuit jurisjurandi religio. *Cicero de Romanis*: Nullum vinculum ad adstringendam fidem majores nostri jurejurando

Idem paulo
ante.

arctius esse voluerunt. Idem *jusjurandum affirmatio-
nem religiosam dicit. Quod autem affirmatè, quasi Deo
teste promiseris, id tenendum est.* Adcoque perjurii reos
Nemefin divinam celeri gressu sequi certò sibi persua-
sum habuerunt.

Hesiod.

- - - - - *Clades mortalibus unde
adveniunt? quoties fallaci pectore jurant.*

Bonfin. rer.
Ung. L. 36.

Quæ enim alia tam gravis causâ dari poterit, quòd ¹³
in hunc diem tanta mala tantâq; damna ab Othoman-
nis perpesi simus, quàm ruptum Amurathi ab Vladis-
lao Hungariæ Rege sacramentum? quod secuta est cla-
des Varnensis: hanc autem amisio tot provinciarum
atque urbium: & tandem vastitas Hungariæ; quæ si in-
tegra & incolumis mansisset, tot bella, quæ cum tanto
periculo rei Christianæ huc usque gesta fuerunt, evitari
potuissent.

Cap. V.
DE FAMA.

HAs igitur virtutes, quas modò
memoravimus, perfectâ & solida GLORIA &
egregia FAMA sequitur, *ad quam Principum
precipua dirigenda. Famâ bella conficiuntur. Fama
constant magna Imperia.* ⁵ *Ea in novis cæptis validissi-
ma, animos hominum, quò vult inclinat, consilia regit,
& pondus rationibus addit. Spem & metum alit, quibus
hominum animos maximè regi diximus; bonam famam
boni plerumque sequuntur consiliorum eventus.*

Id-

s) Fama maximum in bello momentum. Curt. 5, 13, 14. Fama bella stant. Idem. 3,
8, 7, & 8, 8, 15.

2 Idcirco imprimis annitendum est, ut arma Christiana contra Turcæ apud omnes gentes optimè audiant. Nam hucusque Turcæ multò pejorem de nobis, quàm nos de illis opinionem habuerunt, & inter suos disseminaverunt; quæ brevi in melius mutabitur, si cognoverint, apud exercitum nostrum acrem *disciplinam militarem* florere: duces *clementiæ, justitiæ* atque *aquitati* studere, fraudem atque dolum abesse. Virtutes enim illæ non tantum id, quod diximus, operantur, sed & famam sui latè spargunt.

3 Nemo non vivere gaudet, sub imperio justè & honestè constituto, ubi regimen æquabile, tributa tolerabilia & oppressis parata justitia est. Eò convolant populi, ubi ista valere animadvertunt.

4 Ast amplificationi imperii maximè nocet avaritiæ fama; Nam vastum animum, & proferendis magis magisque finibus suis intentum cuncti odere; illum vicinum habere nolunt, qui incrementa de finitimis quærere consuevit; præsertim accedentibus malis artibus, quibus avaritia sæpè numero grassatur. *Est enim vitiorum deterrimum, injustitiam, rapinam, fraudes aliæque mala insatiabiliter complectens, ut mater vitiorum jure dici possit.*

5 Infamiam hanc inurere parabant Romanis, qui IV, 2. eos oderant. A qua ut se alienissimos ostenderent, munifici & liberales erant in dando, parci in accipiendo; quin & ea largiebantur, quæ sine cujusquam reprehensione

D 3

fione

Sall. Jug. 5.

sioneretinare poterant. Etenim victis Carthaginien-
sibus, quascunque urbes & agros in Africa pugnando ce-
perant, Masinissæ Numidiæ Regi dono dederunt.

Liv. 43, 19.

De victo Philippo Macedoniæ Rege, omnibus Græ-
ciæ civitatibus, quæ sub illius imperio fuerant, libertas
& immunitas gratis data. Ista, cum præco pronuncia-
ret, magno stupore ab omnibus audita, & quia supra fi-
dem, nec satis intellecta credebantur, repeti iussa; miran-
tibus cunctis: *Esse aliquam in terris gentem, quæ suâ im-
pensa, suo labore ac periculo bella gerat pro libertate a-
liorum: nec hoc finitimis aut propinqua civitatis homini-
bus, aut terris continenti junctis præstet; maria traji-
ciat, NE QUOD TOTO ORBE TERRARUM INJUSTUM
IMPERIUM SIT, ET UBIQUE JUS ET FAS POTENTIS-
SIMA SINT.* Nulla hic *satisfactionis* mentio facta, quæ
nostro sæculo bellorum omnium conclusio est & com-
plementum. Sic Romani Græcos secuto contra Antio-
chum bello benevolentissimos habuerunt; & tandem
illos ipsos, quos suis legibus tunc vivere jusserunt, sub
nutum ditionemque suam volentes redegerunt.

Liv. 32, 37.

Aurum, cujus sacra fames, bello Punico secundo à
fociis civitatibus allatum, non acceperunt; quamvis
Hannibal in Italia victorem ageret, illi autem pecuniâ
maximè opus haberent. Tali populo in rebus agendis
omnia prona, atque facilia factu sunt: illis contra, qui
famam negligunt, omnia difficilia & adversa. Quod
plurimumq; in *secunda fortuna* usu venire solet, quæ etiam
opti-

optimos mortalium transversos agit. Quippe *superbiam* gignit : Superbia rumorum incuriosa , *fama contem-* Tac. 4. 38, 7
tum ; at *spretâ famâ spernuntur virtutes*, pudor omnis perit, ut foedissima facinora sine Dei hominumvé curâ committantur; ex quo suspicio apud amicos, diffidentia apud socios, odium apud populares, & apud hostes vilipendium, deniq; everfio totius status Reip. sequitur.

8 Multi fortunam incusant, tanquam mobilem & magnis conatibus adversam, quæ extulerit deprimere, & depressa rursus attollere, adeoque res humanas pro lubitu agitare & miscere. Si verò reputemus, quibus artibus aliqui populi magni & opulenti facti sint, & quibus virtutibus ad tantum potentiæ fastigium pervenerint : & rursus omni gloriâ exciderint, faciliè cognoscemus, mutatis moribus mutationem fortunæ contigisse. nam *quilibet fortuna sua faber est* ; neque semper favor ho- Sall. Or. I.
 minum fortunam sequitur, sed plerumque fortuna fa- de Rep. ord.
 mam hominumque favorem.

1 **Q**uod si Deus Opt. Max. annue- Cap. VI.
ret votis, dubitandum non est, prosperos armo- Epilogus &
 rum progressus alios quoque parituros fructus, Conclusio.
 ut salutaria Fœderatorum consilia inter reliquos Christianos Principes locū inveniant. SUMMUS PONTIFEX cuncta sapienter tractari videns, pro summâ suâ in rem Christianam curâ, non solum ipse pro viribus munificentiam suâ continuabit, sed & Reges atq; Principes sibi addictos
per

per vulnera Christi, per communia sacra paternè hortabatur, ut, nisi ad bellum contra communem hostem concurrere velint, saltem illo durante armis abstineant, & dilatis parumper simultatibus suis, alios suppetias laturos non impediant; alias, dissoluto fœdere, & distractis illorum causâ Christianorum viribus, idem fore, ac si maxima Turcis auxilia portassent, neque etiam passuros, ut posteritas dicat per eos stetisse, quo minus Turca ad incitas fuerint redacti.

An. 1518. Papa Leo X. aliquantò plus fecit. Cùm enim Seli-
mus, destructo Mamaluccorum regno, & Ægypto
subjugatâ, pleræque Europæ immineret, inducias quin-
Guicc. l. 13. quennales omnibus Principibus Christianis, quasi ex of-
ficio indixit; Cui quidem illi paruerunt, sed negotium
fœderis sacri perfunctoriè prorsus tractaverunt, quasi
periculum adhuc procul & tanti non esset. Nunc verò
si tantum obtineri posset, ut exsortes belli fidem dare
vellent, se certo temporis spatio nihil molituros, neque ex
quocunque pretextu vi usuros, aut possessiones aliorum
turbaturos, certe multi metu domesticorum motuum
cunctantes, faciliores ad societatem & fœdus futuri essent.

Deinde quotcunque possunt æquis conditionibus;
ad societatem belli incitandi; Wallachiæ, Moldaviæ &
Transylvaniæ despotis libertas suarum ditionum pro-
mittenda, si deficere & in partes transire velint.

II, 12. Supra quidem memoravimus, Pium V. etiam Re-
gem Persarum & Arabiæ Sherifum ad fœdus commune
in-

invitavisse, quod an nunc obtineri possit, valde ambiguum est, siquidem *Muhammedani* (ut quidam ferunt) *lege prohibentur Musulmanno bellum inferre, quamdiu ille cum incredulis* (sic nos infamant) *rem gerat.* Utile tamen foret per unum vel alterum fœderatorum, qui id commodissimè facere poterit, *id tentare, illisque causas belli fusè exponere, & inducias ab illis violatas indicare; Persis præcipuè, qui Turcas, eorumque ritus & mores maximè oderunt; ut quantum fieri possit, attentati cultus sacri suspicio tollatur.* Nam pertinax religionis studium populos istos, magis quàm quisquam putaverit, infensos nobis reddit. Hoc ipsum in causa fuit, quod Tartari, alioquin à Turcis haud satis bene habiti, obstentibus illorum mystis, & sacrorum præsulibus, à societate istorum nuper avelli non potuerint, quod tamen ingentibus pollicitationibus denuò tentandum.

5 At si pactum protectorium, a Muhammede Christianis generaliter indultum, & a multis testibus confirmatum, in forma authentica haberi posset, id certè multum ad commovendos illos populos contra Turcas illius contemtores valeret.

6 Cæterum schismaticos Reges invitare operæ pretium videtur, imprimis *Russorum Autocratores.* Qui, si cognoverint, Patriarchæ Constantinopolitano &

E

Græcis

1) Cui titulus est *العهد والشروط التي شرطها محمد رسول الله لاهل*
 Securitas & pactum quod concessit Muhammedes Legatus *النصرة*
 Dei genti Christianorum. Impressum Lut. Paris. & Lugd. Bat. A. 1655.

Græcis omnibus libertatem rituum suorum permitti debere, cum Cosâcis sibi addiâctis accurrent, maximum pondus bello allaturi. Fortassis Moscovitarum proceres pro sua prudentia considerabunt, etiam ob causas domesticas societatem hanc utilem sibi futuram, *ut scilicet, occupatis otiosorum turbidorumque hominum animis, atque ad bellum intentis, cohibeantur motus interni, apud dominos minores, eorumque consiliarios aliâs frequentissimi.* Si tamen persuaderi nequeant, cum Tartaris committendi essent, quos salvâ pace Turcica distrahere poterunt, ne Polonos invadant.

Thuan. L.

50. An. 1571

Legimus Pium V. non solum legatum in Rusiam 7
destinavisse, sed & ad *Mennam Habessinorum Æthiopum Regem*, quamvis Latinæ Ecclesiæ maximè adversum, ^u literas misisse, quò illum in partes pertraheret.

App. N. III.

ret. eas in fine hujus opusculi adjungemus. Si verò tales epistolas nunc dare è dignitate Beatissimi Patris non videatur, Foederati, quibus ea copia est, illas commodissimè per legatos aliosque viros idoneos mittere poterunt; imprimis ad *Habessinorum Imperatorem*, qui semet *Regem Regum Æthiopia* vocat.

Apud hunc causæ belli diu quærendæ non essent. 8
Portus ejus Turcæ modicis præsidiis occupant: & Patriarcham Alexandrinum, Ecclesia Coptica & Æthiopica caput, quasi captivum tenent: commercia impediunt: concussoribus perpetuis cum negotiatores tum alios
iter

u) quâ ratione P. Romanus ad tales scribere possit, Vide apud P. Nicol. Godignum Soc. Jcl. *De Abyssinorum Rebus.* L. Lc. 19.

iter facientes Christianos vexant: multa que alia facinorosa contra jus gentium faciunt, ob qua quotidiana querela in aulam deferuntur, que presentissimam & justissimam armamovendi occasionem præbunt. Nulla planè subsidia neque pecuniæ neque militum hîc requiruntur. Consilio tantum & viris idoneis opus est, qui machinas bellica tractare, usumque pulveris pyrii illos rectè doceant, & rationem oppugnandi communis hostis ostendant. Id quod hujus rei periti gratis facturum sunt.

- 9 Summopere lætabuntur Habesini, cum audierint, spem esse liberandi Patriarchæ sui Alexandrini: & viam patefieri, sanctum sepulchrum, quod in præcipuâ veneratione habent, liberè visitandi. Animum illis addent *vetustissima quadam vaticinia, qua in animo vulgi plus valent, quam recentissima rationes; nimirum Francorum (sic Latinos vocant) & Habessinorum conjunctis viribus Muhammedanos sedibus suis pellendos.* Fr. Alvar.
Itin. Æth. c.
98.

Siautem ipsis Habesinis talem expeditionem suscipere opportunum non foret, utique finitimis suis, Arabiæ, Dungalæ aut Senaræ Regulis com meatum, pecuniam & alia omnia, quibus bella juvari solent, contra Turcas suppeditare: deficientes verò satrapas, & præsidiorum Maris rubri^x præfectos opibus suis sustentare, & sic per alios gravissimum Turcis negotium facessere, atq; vicinam

E 2

nam

x) Hac parte Turcas aggredi Lusitanæ Rex superiori seculo commodissimum & fructuosissimum existimavit. Thuan. L. 50. A. 1571. §. Cum hoc.

36 NAUTICI POPULI IN SOCIETATEM PERTRAHENDI. Cap.VI.
nam Ægyptum infestare possent. Plura huc facientiâ in
promptu sunt, si spes aliqua societatis cum hac gente in-
stituendæ daretur.

Præterea cum nauticis populis agendum, ut copias¹⁰
suas navales Sereniss. Venetorum Reip. auxilio mittant;
propositis præmiis, & concessio aliquo portu commodo,
quem sibi cum omni jure retineant. Post victoriam ve-
rò immunitas à vectigalibus in omnibus portubus à
Turcâ captis promittenda, donec sumtus in naves auxi-
liares facti liberaliter refundantur.

At si talem societatem commerciis suis in mediterræ-¹¹
neo Mari obesse putaverint, *ut modò Africanos pirati-
cam exercentes retundant, ne Turcis opitulentur*; ea enim
re tanquam causâ propriâ neminem alium offendi
posse: deinde *ne agrè ferant, ut ex popularium suorum
navibus arma, ferrum & alia ad bellum idonea, hostibus
destinata, auferantur*, ut ea potius ad Christianos vehe-
re discant. Quo versus autem exercitus in expedi-¹²
tionem educendi: quævé provinciæ aut urbes primo
loco oppugnandæ sint, meæ tenuitatis non est dicere.
Neq; etiam belli peritissimus absens & in urbe locatus
sciverit, quæ armatis agenda sint. Quippe bellum rarissi-
mè ex proposito geripoteest, consilium in arenâ capien-
dum. *Occasiones non nobis, sed nos occasionibus inservire
æquum est.* Neque cuiquam exploratum esse poteest,
quomodo sese habiturum sit bellum, non dico ad æsta-
tem, sed ad mensem, ad paucos dies.

Eapropter & Ducibus liberiores manus relinquen-¹³
dæ:

dæ : & auxiliaribus laxiora mandata impertienda sunt, quò nutum & imperium partis principalis sequantur. Nam quorum res agitur, eos nihil temerè neque incautè ausuros credibile est ; quare eos sequi nec inconsultum putabitur. Post memorabilem illam apud Echinadas pugnam, ductores auxiliariorum tempestivè nimis domum redierunt, mandata sua prætexentes ; scilicet, qui ea dederant, de tanta victoria non cogitaverant, ideoque de ea prosequendâ mandata dare non poterant.

- 14 Si tamen quæ sentio publicè dicere liceret, optarem, *ne minuta sectarentur exercitus, neque in reprimendo uno vel altero refractario tempus tererent.* Nam si victores bello sumus, omnes illi parvi adversarii suâ sponte se submittent ; sin minus, eò audaciùs nobis quandoque insultabunt.

- 15 Aliàs in votis haberem, ut ipsum caput rerum peteretur ; cui fini maximo armatorum numero complenda classis. Sestus & Abydus, secundante vento, & prospero tantisper fortunæ flatu, transitum non prohibebunt. Urbs minimè munita & ubique patens, tanto conatu attonita, sive vi sive pactis admissura est viros fortissimorum tantum facinus audentes. *Græcis immunitas, sui ritus atque leges : Judæis & Servis omnium nationum si fidi fuerint, libertas : transfugis impunitas : ipsisque Muhammedanis securitas proclamanda est, si positis armis admittere victores velint.* Varietas nationum in multitudinem dispersa, & inter se discors, ab uno neque regi, neque validè resistere poterit.

De bell.
Turc. 3, 98.

Militibus autem nostris, ut imperio ducum modestè pareant, neque prædas ante datum signum agant, multò minus eas igne & sanguine corrumpant, præmia magnà è magnatum domibus promittenda, atque stipendia debita accuratè solvenda; ex quo plus lucri habituri sunt, quàm si turbulenta direptione omnia dissipentur. Præsto erunt Cosaci, victoriam hanc viribus suis ut viciniore conservaturi. Majus & gravius est hoc facinus quàm ut hîc publicè declarari debeat, per quos & quo pacto effectui dari possit. Superantius consilium hoc haud exigui laboris & temporis esse (*ut quidam ausi fuerint scribere*) censuit. Quod de statu illius temporis intelligendum; nunc verò pavor & consternatio populorum maxima: & præcedente aliquà insigni clade res perturbatæ, aliud suadere poterunt. Atque hunc ipsum casum Superantius admittit. E propinquo accuratius id expendent, qui summæ rei præsumunt, nec non arte & Martem gerere ex æquo callent. Quapropter ad alia pergo, quæ fortassis non minus paradoxa videbuntur.

Irrideri vulgò solent, qui ante victoriam *Encomia* ¹⁶ *canunt*: & stultum nonnulli putabunt prædam dividere priusquàm capta sit. At in magno fœdere, rebus ex voto fluentibus, salutare imò necessarium est, de partendis provinciis inter se agere priusquam occupentur. Neque exemplo rescaret. *Nam multò facilia sunt pacta ante quàm post victoriam; quia non difficulter id alii*

cedi-
y) Videantur acta fœderis A. 1571. VIII. Cal. Jun. inter Pontificem, Reg. Hispaniæ & Venetos initi. Item Leo ab Aitzema Histor. Pac. Belg. A. 1635. p. 174.

cedimus, quod nondum cepimus; at super divisione ac-
quisitorum discordiæ plerumque nascuntur.

17 Non minus utile foret pacis conditiones inter se de-
terminare, atque secreto sibi invicem aperire quales quis-
que habere velit; quò Turcis pacem petentibus ab
omnibus idem respondeatur: & unus omnium negotia
gerere possit, si fortè propitius Deus gratiam illi fecerit
hostes in extremum discrimen adducendi, ut imperata
se se facturos dicant. Longum tunc foret fœderatorum
sententias exquirere, & inter se conciliare, aliis hoc, aliis
aliud petentibus.

18 Nam præcipuè cavendum, ne unus ingratiis reli-
quorum ab armis discedat, sed ut pax unanimi om-
nium consensu peragatur; *addita conditione, unius in-
juriam fractâ ab hostibus pace omnium fore.* Hoc pa-
cem stabilem efficiet, atque sic bello composito, hone-
stus exitus fœderi imponetur. Quippe *fœdera qua in-
vitis sociis dissolvuntur, & maximam animorum alie-
nationem pariunt: & alio tempore agerrimè colligantur;*
dum alteri alteris malam fidem exprobrant. 2

19 Verùm enim verò, tanta victoriæ præmia expeteri-
da non sunt, ut propterea dedititii & defectores dese-
rantur, & hostium crudelitati exponantur; quod infamiam indelebilem Christiano nomini allaturum esset.
Sed imprimis *Wallachia, Moldavia atq; Transylvania*
Despotis consulendum, ut si fieri possit, immunitas ple-
naria

2) Exempla recentia nimis sunt odiosa. Vide Thuanum supra I. 6, c. allegatum.

naria illis obtineatur. Sic nobis semper fidi, ac velut limitanei milites erunt, quibus limitrophos fundos quærere opus non sit, ut fines nostros tueantur.

Adhæc coloniæ in loca vastata deducendæ: & militibus agri hostiles distribuendi; nullo alio onere, quam ut milites maneant, armorumq; exercitia nunquam deponant: atq; delectum, orto fortè bello, patiantur; ipsi agriculturam & pecuariam exerceant, mercaturâ advenis relictâ. Plura successus belli docebit.

Cæterum multæ rationes suadere videntur, *ne rursus inducia sed perpetua pax contrahatur.* Quia elapso induciarum tempore non omnibus æquè commodum erit, vel simul inducias continuare, vel eodem tempore bellum conjunctim resumere.

Quamvis autem res hominum ita comparatæ sint, ut æterna pax quidem optanda, speranda tamen vix sit, idè de certâ eaq; honestâ quadam belligerandi ratione cum hostibus conveniendum esset, *ut bella à belluina rabie & insano furore ad humanum aliquem modum vertantur: ut captivis certum statuatur pretium: verbera atque tormenta absint: ut incendiis abstinetur, rusticis atque inermibus parcatur.*

Frustra a barbaris expectari dixerit aliquis, quæ à Christianis sperare vix liceat. Sed inter istos nunquam hac de re actum memini; & æterna pax (ut quidem appellatur) talibus conditionibus non visa fuit opus habere. Certè, si quis ejuscemodi tractatus respueret, iniqui-

quitatis & improbitatis summæ se omnibus reum sisteret. *Quivis sapiens inter præsentia etiam de futuris cogitat, quæ talia contingere possunt, ut versâ fortunâ ejusmodi stipulationem neglexisse, aliquem pænitere possit.* Incertum enim est quid serus vesp̄er ferat.

24 Postremò, quod primo loco dixisse oportuit, spectata Fœderatorum pietas, & commiseratio cogitatione *miserorum Christianorum sub Turcico jugo gementium* dubitare nos non sinit, quin tempore pacificationis illorum recordaturi sint; sive *Grati*, sive *Armenii*, sive *Coptitæ*, sive alio quodam nomine vocentur, modò Christi Θεανδρώνες nomen reveantur. Nec enim schismatis culpam, majoribus eorum fortè imputandam, in omnem posteritatem ferent. Homines simplices, probi atque innocentes, sine odio nostri, sine controversiarum intellectu, ritus à majoribus acceptos, sine cujusquam injuriâ retinent; gratiam, quam nunc non possunt, aliquando relaturi sunt. *Modo templa, quæ adhuc tenent, tranquille possidere, eaque collapsa reedificare liceat: atque tributa consueta, decimatione tantum liberorum sublata, solventes ac modeste parentes, sacris suis quietè uti possint.* Etenim Turcæ victoriâ humiliati, amplos tractatus pacis, & conditiones plurimas aliàs insolitas admittent, multaque concedent, quæ olim ab illis sperare haud licuit.

25 JESUS CHRISTUS pro nobis omnibus crucifixus prosperabit arma contra hostes crucis. *In hoc signo vin-*

F
mus,

• 42 CONCLUSIO CUM INVOCATIONE NOMINIS DIVINI. Cap. VI.

mus, si crucis amicos patrocinio nostro dignabimur.

Prov. 21, 33. *DOMINI est causa, ideo & à DOMINO victoria speran-*

Ps. 67, 2. *da. Equus paratur ad diem belli, DOMINUS autem sa-*

Ps. 114, 1. *lutem tribuit. Igitur exsurge DEUS & dissipentur inimici*
tui, fugiant qui oderunt te à facie tua. Non autem nobis
DOMINE, non nobis, sed nomini tuo da gloriam; sic exul-
tabimus & delectabimur omnibus diebus nostris.



INDEX CAPITUM.

Cap. I. *Scopus autoris* pro maturâ & solidâ victoriâ ex-
 ponitur. p. 1.

II. *Clementia* erga deditos commendatur, ejusq;
 vis pro obtinenda facili victoriâ indicatur. 8.

III. *Justitia* Imperiorum basis & stabilimentum
 devincit subiectos novos, & veteres in officio
 retinet. 16.

IV. *Fides*, dictorum & pactorum veritas & obser-
 vatio animos hominum conciliat, ut fidu-
 ciam bonam in dictis & factis alicujus po-
 nant. 23.

V. *Fama* bella conficit, & consiliis faciles atque
 prosperos eventus largitur. 28.

VI. *Epilogus & Conclusio* agit de consiliis cum ar-
 mis jungendis, & solidè componendâ
 pace, salvo prudentiorum judicio. 31.

AP-

APPENDIX

43

Nonnullorum supra N. I. II. III. allegatorum.

N. I.

NOrabilis est L. Cœli Lactantii locus, quem supra c. 2. §. 10. dedimus. Is libro V. cap. XX. Divinarum institutionum in gentium sævitiam contra Christianos multis invehitur; ex quibus pleraque ad Turcas quadrant, quæ ideo per Epitomen hic dare volumus. Sic autem loquitur: *Discant igitur & suarum & alienarum interfectores animarum quàm inexpressibile facinus admittant: Primum, quòd seipfos jugulans, perditissimè demonibus serviendo: deinde, quòd nec ab aliis colì Deum patiuntur, sed avertere homines ad mortifera sacra contendunt: nitunturq; summâ diligentia, ne qua sit anima incolūm in terra, quæ saluo statu suo spectet in cœlū. Qui in hæc entes persuasioni vulgari, libenter errant, & stultitia sua favent. A quibus, si persuasionis ejus rationem requiras, nullam possint reddere, sed ad majorum judicia confugiant, quòd illi sapientes fuerint, illi probaverint; illi scierint, quid esset optimū, seq; ipsos sensibus spoliant, ratione abdicant, dum alienis erroribus credunt. Atque utinam soli errare, soli desipere vellent; alios etiam in consortium sui mali rapiunt, quasi habituri solatium de perditione multorum. Sed hæc ipsa ignoratio efficit, ut in persequendū sapientibus tam male sint, fingantq; se illis consulere, illos ad bonam mentem velle revocare. Num igitur hoc sermone, aut aliqua ratione reddita facere nituntur? Minimè, sed vi, atque tormentis. O mira & cæca dementia! In iis putatur mala mense esse, qui fidem servare conantur: in carnificibus autem bona. In iisne mala mens est, qui contra jus humanitatis, contra fas omne lacerantur? An potius in iis, qui ea faciunt in corporibus innocentum, quæ nec sævissimi latrones, nec iratissimi hostes, nec immanissimi barbari aliquando fecerunt. Quin imò si qua illis fiducia est; vel in philosophiâ, vel in eloquentiâ, arment se, ac refellant hæc nostra, si possunt: congregiantur cominus, & singula quæque discutiant. Et quoniam vi nihil possunt, (augetur enim religio Dei, quanto magis premitur) ratione potius & hortamentū agant. Procedant in medium Pontifices, seu minores, seu maximi, flamines, augures, item sacrificuli, quique sunt sacerdotes & antistites religionum. Convocent nos ad concionem, cohortentur ad suscipiendos cultus Deorum, persuadeant multos esse, quorum numine ac providentia reguntur omnia, ostendant origines & initia sacrorum ac Deorum, quomodo sint mortalibus tradita: qui fons, quæ ratio sit, explicant. Quæ omnia non asseveratione propria, (nec enim valet quicquam mortalis hominis autoritas) sed divinis aliquibus testimoniis confirmant, sicuti nos facimus. Non est opus vi, & injuriâ: quia religio cogi non potest: verbis potius, quam verberibus res agenda est, ut sit voluntas. Distringant aciem ingeniorum suorum, seratio eorum vera est, afferatur: parati sumus audire, si doceant. Tacentibus certè nihil credimus: sicut ne servientibus quidem cedi-mus. Nos enim non illicimus, ut ipsi obsecant, sed docemus, probamus, ostendimus.*

F 2

Ita-

44 Itaque nemo à nobis retinetur invitus. Inutilis est enim Deo, qui devotione ac fide caret. Et tamen nemo discedit, ipsâ veritate retinente. Doccant isti hoc modo, si qua illis fiducia veritatis est, loquantur, discant, audeant, inquam, disputare nobiscum aliquid ejusmodi. *Jam profecto ab amiculis, quas contemnunt, & à pueris nostratibus error illorum ac stultitia irridebitur. Sciant igitur vel ex hoc ipso, quantum intersit inter verum & falsum, quando ipsi, cum sine eloquentes, persuadere non possunt, imperiti, ac rudes possunt, quia res ipsa, & veritas loquitur. Quid ergo sapiunt, ut stultitiam suam, dum minuere volunt, augeant? Longè diversa sunt carnificina & pietas; nec potest aut veritas cum vi: aut justitia cum credulitate conjungi. Sed meritiò non audent quicquam de rebus docere divinis, ne & à nostris derideantur, & à suis deserantur. Nam fortè vulgus, cui simplex, incorruptumq; judicium est, si mysteria illa cognoscat in memoriam mortuorum constituta, damnavit, aliudque verius, quod colat, quæret. Hinc fida silentia sacris instituta sunt ab hominibus callidiâ, ut nesciat populus quid colat. Sed defendenda sunt, inquit, suscepta publicè sacra. O quàm inhonesta voluntate miseri errant? Sentiant enim, nihil esse in rebus humanis religione præstantius, eamq; summa vi oportere defendi: sed ut in ipsa religione, sic in defensionis genere falluntur. Defendenda enim religio est, non occidendo sed monendo: non sævitia sed patientia: non seclere, sed fide: illa enim malorum sunt, hæc bonorum. Et necesse est, bonum in religione versari non malum. Nam si sanguine, sit tormentis, si malo religionem defendere velis, jam non defendetur illa, sed polluetur, atq; violabitur. Nihil enim est tam voluntarium, quàm religio: in qua si animus sacrificantis adversus est, jam sublata, jam nulla est. Igitur Dei cultus, quoniam militia celestis est, devotionem maximam, fidemq; desiderat. Quomodo enim Deus aut amabit colentem, si ipse non ametur ab eo: aut præstabit peccanti, quicquid oraverit, cum ad precandum neq; ex animo, neq; observanter accedat, &c.*

N. II.
EPISTOLA VII.

Illustri Viro Siecco Persarum Regi
Potentissimo.

Illustri viro Siecco Tahamasso Persarum Regi. Spiritus veritatis illuminationem. Nullum nobis dubium est, quin & litteris multoties & nuntiis, ac deniq; rumore ipso ad te sit allatum de ingenti & gloriosissima, atque adeò post hominum memoriam maximâ navali victoriâ, quam Dei O. M. ope ac benignitate, Nonis Octobris proximè præteritis, Christiani Principes scedere sociati, in sinu Corinthiaco prælio cum validissimâ inprimisque copio-

sâfe-

fâ ferociffimi ac potentiffimi *Selymi Orhomani Turcarum Tyranni* classe commiffio, 45
 divinitus reportarunt. Quo quidem in prælio videre fuit *captas vel depressas ad*
trecentas easdemq; instructiffimas atq; ornatiffimas hostium triremes, aeneis tormen-
tis partim receptis, partim vero demersis, trierarchis suis ac ducibus navarchis, mi-
litibus atq; remigibus, cum omni apparatu militari, fufis, occifis, ac penitus occidione
deletis; paucis quibudam exceptis, qui statim arrepta fuga periculum evaserunt.
 Quod fanè divini providentiâ factum effe, certè feito. Nam anno superiore non
 sine summo animi nostri dolore cùm intelligeremus, *Selymum* pro effrenatâ atque
 inexplebili aliena rapiendi cupiditate, ac pro infito sibi ac perpetuo rerum potien-
 di desiderio, rupto pacis vinculo, quo non ita pridem cum *dilecto Filio nostro no-*
biliq; viro Venetorum Principe, eâq; cum Republicâ sese conjunxerat parens ejus *Soly-*
manus, quodque ipsemet, posteaquam est ad maximam illam, ac præter alias om-
 nes formidabilem Regni potestatem evectus, arctius confirmaverat, cunctis sive
 humanis sive divinis legibus nefariè violatis, ac collectis undiq; militibus, se *Cy-*
prum in Regnum, jam diu Venetis subiectum, intulisse, summisque belli viribus in-
structum urbes crudeliffimè expugnasse, diripuiffiq; ac demum eam insulam om-
nem devastando in potestatem redegisse; ad boni Pastoris officium nobis divini-
tus commissum pertinere existimavimus, tantâ super re nihil amplius esse cunctan-
dum, sed vehementer in Deo Domino cohortari & commonere, & rogare oport-
ere Christianos Principes omnes, imprimisque chariffimum nostrum in CHRISTO
Filium Philippum Catholicum Hispaniarum Regem, nupote inter ceteros præpotentem
& Regnorum amplitudine & multorum robore populorum, & opum divitiarumque
splendore florentiffimum, ut ipsi omnes nobiscum unâ, & cum iisdem Venetis, sensu-
bus viribusque conjunctis, in istius Tyranni rabiem & furorem comprimendum,
 atque in eum à nefariis cogitationibus suis revocandum conspiraremus. Quo qui-
 dem laudabili utilique consilio nostro, perpetuis laboribus, assiduis vigiliis, singu-
 lari sollicitudine nostrâ ac patientiâ, Deo benè juvante, feliciter constituto, Opta-
 bilem æquè ac necessariam inter nos societatem coivimus, ad laudem & gloriam
 Dei. Idq; non quidem, quòd bellicas ac militares cogitationes libenti animo sus-
 cipiamus, cùm alioqui pacis amantiffimi vindictæ simus; sed ut, quæ attollere su-
 perbia solet cornua, deprimamus omnino, atque adeò confringamus. Nobis igitur
 talem, uti diximus, ac tantam victoriam adeptis, id prorsus non solum Chri-
 stianis, sed cunctis etiam Regibus totiusque terrarum orbis Principibus maximo
 est adjumento futurum, imprimisque tibi, perpetuas easdemque graviffimas cum
 Orhomannicâ domo inimicitias gerenti, pro veteri vestro & inexpiabili in eam
 odio à majoribus vestris hereditario quasi jure in vos usque derivato. Quod qui-
 dem facili fiet, si hanc, quæ ultro tibi sese offert, opportunam rei bene gerendæ
 facultatem haudquaquam prætermittendam esse judicaveris. Quamobrem ejus te
 merito admonendum esse duximus, quin etiam ad communem utriusque nostrum
 utilitatem ob oculos tibi omnino decernendum proponere voluimus, ut ejus-

46 modi occasionem, divinitus oblatam, forti alacrique animo complecti ac persequi velis, quâ nullam meliorem poteris unquam reperire. Itaque primo quoque tempore iustum exercitum colligere, atque in istis Orientalibus plagis de improvviso communem hostem invadere debes omnino, ut, dum ipse rebus suis afflictiis, atque ipsâ maximâ, quam suprà commemoravimus, clade confictatus interjaceret, possis eas, quas Othomannus clarissimis Persarum Regibus identidem intulit injurias, ulcisci; vel damna compensare ac refarcire: atque etiam ut Mesopotamiam ac Syriam provincias, nec ita pridem vobis subiectas, sed ereptas, & à Selymo iniquè per vim occupatas, eodem tempore recipias atque recuperes. Quæ res tibi haud difficilis erit obtentu. Nos enim ista nobiscum considerantes verè colligimus. *Selymus* incredibili hac calamitate fractus ac debilitatus, vidensque maritimo se spoliatum imperio, teque istinc fortissimè depugnantem, ex alia verò parte Christianos sœderatos validissimas ac fortissimas copias ex Europâ ad bellum in eum terrâ marique gerendum educentes, uno & eodem tempore tot tantosque impetus sustinere, aut paribus viribus congredi nullo modo poterit. Quapropter nos potentissimum Deum, in cuius manu Regum sunt corda, supplices deprecamur, ut te ad præclara illustriaque fortiter aggredienda facinora, ad eademque deinceps summis viribus conficienda, commoveat, accendat, inflammet; atque ut res tuas omnes ab acerbissimo ac teterrimo humani generis hoste benignè tucatur, simulque felices eventus tuos augere velit ac prosperare. Quæ quidem omnia, is quem cum his literis ad te mittimus, planiùs explicabit. Datum *Roma* apud sanctum Petrum sub annulo Piscatoris, *XVI. Kalend. Decembris* M. D. LXXI. Pontificatus nostri anno sexto.

EPISTOLA VIII.

Potenti Seripho^a Mutahar Regi Arabix Felicis.

Potenti *Seripho Mutahar, Arabia Felicis Regi, Spiritus veritatis illustrationem.* Dubium non est, quin communis imminentium periculorum metus, injuriarumque earundem communio, ad quorumvis vel Principum vel populorum animos confociandos plurimum valeat; tametsi maximis locorum intervallis disjuncti, aliisque permultis rationibus inæquales essent & impares. *Turcarum Tyranni*, tantâ dominandi propagandique sui fines Imperii cupiditate, tantaque divitiarum & auri siti continenter exardescunt, omnibus ut Principibus & gentibus ob id infesti esse non desinant: mor-

a) Scherff (ut Germ. pronunciant) propriè Rex non est, sed Princeps eminentis Nobilitatis, & quidem è genere Muhammedis. Talis est qui loca circa Meccam & Medinam sub ditione sua habet, tanquam Patrimonium Muhammedis, cumque Musulmanni tanquam summum aliquem Pontificem inter suos suspiciunt.

mortalesque omnes æquè sibi subicere, eosdemque opprimere concupiscant. Sed 47 quoniam vires suas, ac potestatem quamvis magnam, haud satis esse subinde cognoscunt; hac semper arte astutiaque sunt usi, ut tantisper, dum bellum in certos adversarios moverent, cum ceteris interim pacatos se & amicos esse simularent. Ex quo factum est, ut, summo perfidie scelere, *Persis, Arabibus, Græcis, Alemannis, Hungaris, Italia*, nobilissima Regna provinciasque identidem eripere tyrannidique suæ adungere non dubitarint. Quorum quidem felice rerum successu, Regnique potentia & amplitudine, eorum audacia, temeritas atque superbia eousque pervenit, ut, qui illorum armis sese audeat opponere, neminem esse sibi persuadeant: quin omnes homines vel ad nutum dicto sibi putant audituros. His igitur consiliis *Selymus*, qui nunc *Tyrannus* imperat Turcis, diligenter instructus, anno superiore nobilissimæ Venetæ Reipublicæ *Cypri Regnum*, atque alia tùm maritima, tùm terrestria loca eidem Reipublicæ subiecta, hostilem in modum eripere cœpit atque occupare; spreto jure societatis, violatis pactis & conventis, nullaque jurisjurandi à semetipso dati habita ratione; neque ullâ vel minimâ occasione laceffit. Quamobrem nos & pro paternâ, quam nobis, meritis licet imparibus, Christiani totius populi sustinendi curam Deus commisit, repentè per literas ac nuntios Christianos Principes omnes monere cœpimus & cohortari, ad conspirandum in maximam istius crudelissimi hostis nostri comprimendam insolentiam ac ferocitatem. Hinc igitur cœdere inter Catholicum Hispaniarum Regem &c.

(Sequuntur eadem, quæ in literis ad Persarum Regem.)

Næque verò nos conquiescimus unquam, donec Christianos Principes omnes incitaverimus, efflagitando, ut aduictâ societate, & quàm maximis poterunt bellipædiis & copiis comparatis, insequenti vere terrâ marique immanem hostem circumveniant atque aggrediantur. Sed hoc ipsum etiam consilii tibi significandum est. censuimus, ut intelligeres in præsentia commodissimam tibi atque optatissimam occasionem offerri, sic ut fortasse nullam talem unquam sis habiturus, communem videlicet hostem aggrediendi ac persequendi, recuperandi; res tuas, si quas olim ille per injuriam occupavit. *Quod quidem ad agendum, atque ad hanc ipsam & reitua bene gerenda, & istius scelerati hostis deprimenti opportunitatem, arripiendam, ac summo studio complectendam, te etiam atq. etiam hortamur & suademus, ac simul etiam obtestamur.* Sic enim dubitare nemo debet, quin hostis iste circumseptus maximis ac validissimis exercitibus, & classibus divexatus, vestros simul & nostros acerrimos impetus haudquaquam sustinere queat. Potentissimus Deus optimam quamque hujusce te consilii rationem edoceat, ut prorsus moliaris id atque perficias, quod & tibi sigillatim & universo terrarum orbi sit saluturi futurum; quemadmodum etiam, qui has nostras ad te literas perferet, latius edocebit. Datum *Roma* apud sanctum Petrum sub annulo Piscatoris, *XV. Kal. Decembris*, M. D. LXXI. Pontificatus nostri anno sexto.

Charissimo nostro in Christo Filio,
Mennæ^b Regi Regum illustri
Æthiopum Regi.

Fr. Goubau.
 d.L.V. 2p.9.

C*harissime noster in Christo Fili, salutem & Apostolicam benedictionem.* Quoniam pro ea charitate, quâ decet, in Domino nos valde diligimus atque æstimamus Majestatem tuam, utpotè magnum, excelsum ac præpotentem Principem, atq; Christianæ religionis amantem: cumque præterea istis in oris ad gloriam & honorem Dei ac Domini nostri Jesu Christi, potentiam tuam auctam esse cupiamus, faciendum esse duximus, ut his literis nostris certior fieres, de maximâ gloriosissimæque victoriâ, quâ idem Dominus ac Redemptor noster Christianorum classem exercitumque nuper dignatus est. Etenim anno superiore *Selymæ Turcarum tyrannus*, &c.

(Hic sequitur narratio cladis Turcicæ; quâ finit Pontifex ita pergit.)

Cum igitur noster hic immanissimus hostis omni suâ classe dispoliatus, gravissimaque acceptâ clade perterrefactus, ac meritò fusus & fractus succumbat: cumque omnis ejus o. a maritima nostrorum pateat excursionibus, nos neque prætermisimus antea, neque adhuc indies prætermittimus Christianos Principes excitare, & impellere ad tam præclaræ nobilisque victoriæ fructus uberrimos percipiendos; ut & ipsi etiam in societatem adscripti, quantis maximis poterunt bellicis apparatus ac viribus instructi, teterrimum hostem terrâ marique petere, atque undique cingere aggrediantur. Quocirca nos pariter hortamur Majestatem tuam, oramusque, ut posteaquam potentissimo Deo, patri misericordiam & Deo consolationis, Dominoque exercituum de tam excellenti honorificaque victoriâ, uti nos quoque fecimus, quas decet, gratias egeris, libenti promptoque animo velis opportunissimam hanc captare occasionem, *crudelissimi Tyranni, ac potissimum Christiani nominis hostis acerrimi, temeritatem, ferociam atque superbiam compescendi.* Id autem eveniet, si, undecunque fieri à te poterit, bellum in eum commovendum esse decreveris, *quò longius latiusque fines tui possis imperis, ac simul Christi religionem propagare.* Quâ quidem in expeditione conficiendâ, nihil omnino dubitamus, quin Latini sanguinis vires, opera & studia Majestati tuæ sint adjuvamento futura. Datum *Romæ* apud S. Petrum sub annulo P. scatoris *XV. Cal. Decembr.* M. D. LXXI. Pontificatus nostri anno sexto.

Literas hæc Pius V. Sebastiano Lusitaniz Regi curandas miserat, rogans, ut per hominem idoneum deferrentur, ut ex epistolâ, ob hanc rem datâ liquet.

Numa

b) Minas seu Menas Æthiopicus dictus fuit, cognomento Adamas Seghed Davidis F. Claudii fratris successor, *Histor. Æthiop.* L. II, c. 6, n. 29.

Num verò delatæ fuerint ambigo. Menas enim Æthiopum Rex ante annos octo 49 mortuus fuerat, nec quicquam amplius de hac re legitur. Cæterum ad exarandas tales literas inductus fuisse videtur Pius V. epistolâ R. Sebastiani anno superiori ad se datâ, in quâ classẽ in mare rubrum contra Turcas mittere promiserat, post cætera sic scribens: *Enimverò cum Reges Arabum dirâ Turcarum tyrannide pre-* L. V. ep. 5
manantur, in eo potissimum laborant, ut à cervicibus suis gravissimum illud servitutis
jugum excutiant; quippe qui jam ab illis defecerint, aliquotiesque terrestri commisso
prælio victores evaserint: sed tamen navalibus pugnis congregandi, aut cerè navi-
buss, ne suppetia ferantur hostibus, impediendi, haud pares vires habent. Itaque &
nostro fœdere & à nobis expediendâ classẽ ipsi vehementius incitati, divinoque auxi-
lio premuniti, hostilibus minis ac terroribus contemptis, stabunt à nobis. Hac enim
classẽ Turcarum portus atque perfugia, quæ sunt maritimis in illis oriis, permittente
Deo, conficiabuntur. Hac classẽ deinceps intercludetur aditus eorum navibus, qui-
buss, pretiosissimis mercibus Orientalibusq, divitiis onustis, tyrannicum imperium
suum dicare consueverunt. Hac classẽ fiet, ut in posterum illis facultas omnis eripia-
tur habendi remiges, aliosq, homines navigandi peritos, & exercitatos, quos ille
Tyrannus ad classium suarum usum, vel ex Arabiâ solet evocare; quorum etiam
hoc tempore ob gravissimam acceptam cladem, summâ laborat inopiâ. Tanta scilicet
est in Arabiâ hujus generis hominum copia, ut ferè omnes, quorum servitio in navi-
gationibus utuntur Lusitani, Arabes sint. Hujus præterea classis ope, maximum
illud Æthiopum imperium, cujus salus & restitutio continenter sollicitat Beatiitudi-
nem suam: quodq, Turca sapiens invaserunt, ac pro eâ quâ ejus potiundi (quod om-
nino Deus avertat, id enim magno Christianæ Religionis esset incommodo) spe &
cupidine flagrant, inflammatis animis insolascunt, divinâ favente clementiâ re-
spirabit &c.



N. IV.

*Sequuntur excerpta notabilia ad bellum contra Turcas
gerendum pertinentia.*

Augerius Gislenius Busbequius, Cæsa-
reus quondam Legatus, ad Solimannum Turcarum
Sultanum, de re militari contra Turcam
instituenda.

EXposito maximo periculo in quo res Christiana tunc temporis versabatur,
Exclamat: *Armis opus est! Opus est armis! Arma capissimus!* Scilicet tunc
temporis in propulsando bello laborabatur, non ut nunc in proficquendâ
victoriâ, & occupandis hostium provinciis, qui status rerum diversus di-

G

ver-

go versum agendi modum postulat. Igitur Busbequius *secordiam nostram incusat*, & in traclando bellonegligentiam, quod copia parum idonea hosti exercitissimo obiciantur. Etenim invehitur in mercenarios seu conductitios; ubi Turca cum numero exercitu venisset, quasi interrogans, inquit: *Quem militem cœgimus? num veteranum? num exercitatum?* non opinor, sed potius huic dissi nillimum. *Pulsata longe lætēq; sympana; adeorum strepitum convenere lucelli spe, quibus visum fuit. Nemo qui loriscam aut thoracem unquam induerat, nec hostem à belli limine salutaverat.* Reliqui quales! *Homines luxu perditis, decoctores, ganeones, aleatores, obervati, exsules, atq; his similes (paucis exceptis) ferè reliqui; quos eò perduxit non patria caritas, non aequitas causa, non religionis studium, non amor exercenda virtutis, sed ebrietas, alea, rapinarum, sacrilegiorum, stuprorum, & (ut uno verbo dicam) scelerum & flagitiorum omnium impunitas atq; licentia.* Cum huiusmodi turba nullo delectu collecta, vel potius cum face perditorum hominum, Deo pariter atque hominibus inuisorum, contra tantum hostem, sacrum videlicet auspicamur bellum. Itaque non tam militum conventus, quam Bacchanalia, nostra castra videri possunt; ubi luxuria, corruptelis, libidine, impietate, crapula, tumultu, rixis, atque cadibus strepunt & permiscantur omnia. Hic tamen tam bellus miles, magnus impendis procul est à suis sedibus excitandus: magnaq; cum iacturà temporis, ubi etiam res summam celeritatem exigat, perducendus. Fortem & asuetum laboribus Hannibalis militem Campana luxu & delicia frugerunt: nobis nullà opus est Campanià; imbelles, enervati, perdit in castra venimus. Itaq; si hostis desit, morà paucorum mensium, aut canicula fervor, aut primorum frigorum morsus, quantumvis magnas copias nostras maclant & jugulant, &c. Revertor itaq; eò quod initio dixi: aut idoneorum armorum praesidio publicam incolumitatem incendam: aut nullam rem relinqui, qua nos ab universo exitio vindicare possit.

Deligi ergò Romanorum more milites vult Busbequius, non eni. Quales autem esse debeant, pluribus sic docet:

1. *E popularibus cum iudicio delectis non procul arcessiti.*
2. *Qui non molliori cultui aut victui assueverint: in recensu magis quàm in divitiis educti.*
3. *Non sedentarii, sed rustici potius quàm urbani: in montibus potius quàm in campis nati.*
4. *Non vitiiis aut otio dediti & à deliciis integri.*
5. *A crapula & ebrietate alieni.*
6. *Bono corporis habitu apti tolerandis laboribus.*
7. *Simplicitatem, animiq; magnitudinem vulnè & oriè lineamentis pra se ferentes.*
8. *Qui stipendio suo & modico victu sint contenti.*
9. *Non contumaces, turbulenti nec seditiosi.*
10. *Ab omni deniq; pradà, praterquam concessa abstinentes.*

Sic

Sic igitur milites suos Busbequius describit, ut verè ne paucos vel omnino nullos suo tempore invenerit, vel nunc inventurus sit. Delectus autem agere & robustissimum quemque è rusticâ inventute ad militiam legere, ab imperii ordinibus diff. ult. r obtinebitur, quanquam id, ut nunc res sunt, defendendæ libertati nostræ, & reparandæ priscæ Germanorum gloriæ consultissimum foret.

Pergit *Busbequius*, atque delectos suos milites disciplinæ militaris præceptis formandos dicit à viris rei militaris peritissimis, *summâ virtute, continentia & sobrietate præditis, nullisq; avaritiæ sordibus contaminatis; ne falsum militum numerum referentibus publicum fraudetur ararium.*

Obijcientibus rem esse novam, usuiq; recepto adversam, nec à majoribus nostris, qui etiam præclaras res gesserint, usitatam, respondet: periculum etiam novum & non usitatum esse, ideoq; novis remediis propulsandum: Hosti vigilantia, industria, exercitatio, labori assueti, disciplina observantissimo, parem militem opponendum. Huc quidem plerumq; summam consiliorum nostrorum redire, ut qualicunq; pace aut induci periculum avertere & prevenire soleamus, sed istud non semper fore in nostrâ potestate; posse enim nos aliquando intoleranda belli mole decerpente obrui. Si enim Turcarum arma aliquando, quod timendum, prævaluerint, nihil nobis reliquum fieri.

Hortatur ergo nos, ut imitemur Populi Rom. prudentiam, qui semper præsidio militum è suis hominibus delectorum imperium suum remq; publicam & privatam tutatus sit, aq; de potentissimis Regibus triumphaverit. In eo omnes consentire qui de rebus Romanis scripserint. Speciatim ex Vegetio de militiâ Romanâ insigniores depromit sententias, & super iis latè differtit.

Porro ne quis ea, quæ proposuit, vetera nimis & obsoleta: homines autem hodie alios esse putet ac olim; Turcarum modum milites deligendi, quem ipse præfens viderit, & suo periculo didicerit, his ferè verbis refert: *Mitti quotannis Turcarum Princeps certos homines in diversas provincias, qui de pueris Christianorum tertium aut quartum quemq; possint. His egratim Constantinopolim perductis, qui liberaliore sunt aspectu, aut ingenio, ipsius Principis, aut Satraparum domesticis usibus applicantur. Reliqui perducuntur in locum, in quem magna hominum, præsertim rusticorum, multitudo co. fluxit. Hi de istis pueris à Mangone præposito, quos lubet, petunt, qui accepto aureo, puerum tradit: prius nomine ejus, patriâ & conditione: item annis signisq; quibus per omnem ætatem dignosci possit, in publicas tabulas relatis. Sic illi liberum est, sive rusticus sit, sive urbanus, puerum quocunque Terrarum velit, in domicilium suum abducere: ubi assiduo labore atq; opere eum ut mancipium exerceat. Pueri victui præbetur panis & aqua; & interdum loco obsonii, pulvis aliquid aut frustum aut herbarum: vestitus stiam, quo se adversus calis injuriam tueri incunq; possit. Ad hac disciplinâ & religione Mahumedanâ instituitur. Ita deliciarum nescius, procul à propinquorum blanditiis, in virum robustum civeis labori ferendo adolefcit. Hic cum opus est ab illo fiduciario hero repositur, & ad*

§2. *rem militarem traducitur: atq; ex hoc velut seminario, diminutis Ghanizarorum legionibus, supplementum subrogatur.* Nullam tum temporis Busbequius victoriæ spem habuit, aliàs fortassis svalisset, ut Turcis, sub ditionem redactis, talionis iure idem fieret. Concludit tandem; *ista neg; nimis nova, neg; nimis vetera esse, ut non etiam ad usum nostrum revocari possint.*

2.

Lazarus Superantius (Soranzi) Patritius Venetus, egregium librum de Imperio Turcico scripsit, quem *Othomannum* vocat, qui multa scitu digna continet. Parte primâ & secundâ describit Imperium Turcicum. Rectissimè autem in præfatione monet; *Principi ad bene regendum ditionem suam necesse esse, ut & rerum suarum, & vicinorum Imperiorum perfectam habeat cognitionem.* Parte tertiâ docet, quomodo bellum cum Turcis sit gerendum, speciatim cap. LXIX. tradit: *Turcas, quæ semel occuparunt, nunquam restituere, maxime si templa vel Meschitas ibi construxerint.*

Cap. LXXIX. Paræneses & officia Summorum Pontificum Urbani, Clementis VIII. imprimis Pii II. orationem ad Principes Christianos, in Concilio Mantuano congregatos refert.

Cap. XCIX. & seqq. de excitandis inter Turcas seditionibus. Cap. CVI. & seqq. Quomodo bellum maritimum gerendum, & qui portus oppugnandi sint. Cap. CXV. De Dardanellis facillimè expugnandis.

Cap. CXVIII. Leonis X. Consultationem de Bello Turcico inferendo exponit; & Cap. CXIX. Christianos Principes ad fœdus contra Turcas ineundum hortatur.

3.

Achilles Tarduccius libellum scripsit cui nomen: *Turca vincibili in Ungaria.* In quò demonstrare se posse putat: *Turcam à sola Hungariâ reliquâ, adhibito exiguo Germanorum auxilio, vinci posse.* Præmittit autem p. I. Historiæ Turcicæ Epitomen. Deinde Cap. I. de Fallaciis & artibus Ottomannicis. Cap. II. Vires, reditus & triplicem eorum militiam describit. P. II. cap. 1. & 2. Vires & militiam Christianorum & Turcarum inter se comparat, & §. 2. docet: *Pecuniam non solum belli nervum esse; & Solonem Cræso thesauros suos commonstranti respondisse: Bella ferro geri, igitur aurum facile auferri posse, si quis ferro melius instructus illum aggrediatur.* Ibid. §. 1. exemplis demonstrat multitudinem nimiam militum plus incommodi, quàm utilitatis afferre. & §. 4. ubi de Commeatu agit, maximam difficultatem inde nasci scribit, quod *militēs nostrī bonis cibis & vino aſueti, agrius ſuſtententur. præſertim propter tot meretrices, lixas & calones.* Minori apparatu Hungaros uti, minimo verò Turcas atque Tartaros.

Tandem quatuor errores refert, quā nostris committantur: 1. *In numero militum nimis parvo vel magno.* 2. *In nimio & inconſulto pugnandi ſtudio.* 3. *In prædis intempeſtve agendis.* 4. *In perſequendis hoſtibus.*

F I N I S.



